

魏
書

第三
函
八
冊

詠
和
寄
寄

PDG

魏書卷九十九

列傳第八十七

私署涼州牧張寔

鮮卑乞伏國仁

鮮卑秃髮烏孤

私署涼王李嵩

盧水胡沮渠蒙遜

張寔字安遜安定烏氏人父軌字士產散騎常侍以晉室多難陰圖保據河西求爲涼州乃除持節護羌校尉涼州刺史桓帝西略也軌遣使貢其方物晉加號安西將軍封安樂鄉侯邑一千戶永嘉五年晉以軌爲鎮西將軍都督隴右諸軍事封霸城侯尋進車騎大將軍開府儀同三司愍帝卽位進拜司空封西平公邑三千

戶後拜侍中太尉涼州牧軌年老多疾拜寔撫軍大將軍副涼州
刺史未幾軌風病積年二子代行州事閉絕音問莫能知者軌頗
識天文每州內有賊輿疾仰觀曰無能爲害終如其言寔代統任
愍帝拜爲使持節都督涼州諸軍事西中郎將涼州刺史領護羌
校尉西平公劉曜陷長安寔自稱侍中司空大都督涼州牧承制
行事于時天下喪亂秦雍之民死者十八九唯涼州獨全寔自恃
眾彊轉爲驕恣平文皇帝四年寔爲左右閭沙等所殺先是謠曰
蛇利砲蛇利砲公頭墜地而不覺寔所住室梁閒有人象而無頭
久之乃滅寔惡之未幾見殺寔弟茂統任

茂字成遜私署使持節都督涼州諸軍事平西將軍護羌校尉涼
州牧西平公誅閭沙等百餘人遣使朝貢茂妻弟賈模兄弟謀害
茂茂殺之劉曜上隴茂懼而降曜以爲太師涼王茂卒無子寔子

駿統任

駿字公庭自稱使持節大將軍護羌校尉涼州牧西平公遣使朝貢煬帝時隴西人辛旻以枹罕降之駿遂有河南之地至於狄道與石勒分境駿築南城起謙光殿於其中窮珍極巧又四面各起一殿東曰宣陽青殿南曰朱陽赤殿西曰正德白殿北曰玄武黑殿服章器物皆依色隨四時居之其旁有直省寺署一依方色其奢僭如此民以勞怨駿議治石田參軍索孚諫曰凡爲治者動不逆天機作不破地德昔后稷之播百穀不墾磐石禹決江河不逆流勢今欲徙石爲田運土殖穀計所損用畝盈百石所收不過三石而已竊所未安駿怒出孚爲伊吾都尉有石隕於破胡燹而碎聲如擊鼓聞七百里其處氣上黑如煙煙首如赤颯駿少而淫佚常夜出微行姦亂邑里少年皆化之性又貪恠有圖秦隴意以穀

帛付民歲收倍利不充者簿賣田宅分武威武興西平張掖酒泉建康西海西郡湟河晉興廣武十一郡爲涼州以長子重華爲刺史金興晉城武始南安永晉大夏武城漢中八郡爲河州以其寧戎校尉張瓘爲刺史敦煌晉昌高昌西域都護戊巳校尉玉門大護軍三郡三營爲沙州以西胡校尉楊宜爲刺史駿私署大都督大將軍假涼王督攝三州始置諸祭酒郎中大夫舍人謁者之官官號皆擬天朝而微辨其名舞六佾建豹尾車服旌旗一如王者軌保涼州陰澹之力駿以陰氏門宗彊盛忌之乃逼澹弟鑿令自殺由是大失人情駿旣病見鑿爲祟遂死時建國九年也子重

華統任

重華字太林私署使持節大都督太尉公護羌校尉涼州牧平西公假涼王石虎遣麻秋率眾渡河城於長最涼州震動司馬張眺

薦主簿謝艾於重華重華任之艾擊斬秋將綦毋安等俘斬萬五千人重華遣使朝貢自署丞相涼王領秦雍涼三州牧重華死子曜靈統任

曜靈年十歲自稱大司馬涼州牧以重華兄祚爲撫軍將軍輔政祚先蒸重華母馬氏密說馬氏以曜靈幼弱須立長君馬從之遂廢曜靈而立祚曜靈尋爲祚所殺

祚字太伯旣統任自稱大將軍涼州牧涼公專爲姦虐駿及重華子女未嫁者皆淫之涼州人士咸賦牆茨初重華末年有螽斯蟲集安昌門外緣壁逆行都尉常據諫曰螽斯是祚小字今乃逆行災之大者願出之重華曰子孫繁昌之徵何爲災也吾昨夢祚攝位方委以周公之事輔翼世子而祚終殺曜靈焉自署涼王立宗廟置百官號和平元年遣使朝貢又追加軌以下王號濫殺謝艾

於酒泉郎中丁琪諫祚僭竊祚斬琪於闕下廢諸神祀山川枯竭
置五都尉司人姦過禁四品以下不得衣繒帛庶人不得畜奴婢
乘車馬百姓怨憤有光狀如車蓋聲如雷震動城邑仲夏降霜有
神降自稱玄冥與人交語祚日夜祈之神言與其福利祚信焉眾
知祚必敗而祚暴虐彌甚明年祚河州刺史張瓘起兵討祚驍騎
將軍宋混率眾應瓘混進攻姑臧祚遣侍中索孚伐瓘有王鸞者
云師出必敗并陳祚三不道祚以妖言惑眾斬之鸞臨刑曰我死
之後軍敗於外王死於內祚族之宋混至姑臧領軍趙長等開宮
門應之入殿稱萬歲祚以長等破混也出勞之長以槊刺祚中額
祚奔入爲厨士徐黑所殺暴尸道左城內咸稱萬歲瓘等立重華
少子玄靖統任

玄靖字元安自署使持節大都督大將軍涼王以瓘爲尚書令涼

州牧秉政宋混爲尙書僕射瓘性猜惡賞罰皆以愛憎無復綱紀
郎中殷郇陳損益諫瓘瓘曰虎生三日能食肉不須人教由是莫
有言者瓘與玄靖參乘出城城北大橋三梁俱折瓘惡之乃日日
散錢帛樹私惠而都街殺人朝朝不絕思爲亂者十室而九東苑
大冢上忽有池水城東大澤地忽火然廣數里乃殺宿嫌牛旋等
以應水火之變瓘謀誅諸宋廢玄靖自立先是太白守輿鬼占曰
以爲州分當有暴兵故瓘欲馱之於是宋混率眾誅瓘瓘先殺妻
子三十口乃自殺玄靖以混爲驃騎大將軍尙書令混病死弟玄
安代輔政以旱祈帶石山玄安欲登之弟名犯世宗諱曰世人云
登此山者破家身亾玄安曰安有此也策馬登之馬倒傷足御史
房屋柱自燃燹折或曰柱之爲字也左木右主宋字含木木燹宋
破而主存灾之大也宜防之又所乘馬五匹一夜中鬣尾禿人曰

尾之爲字也尸下毛毛去尸絕滅之徵玄安曰吉凶在天知可如何未幾玄安司馬張邕起兵殺玄安盡誅宋氏先是謠曰滅宋者田土子邕一名野邕刑殺過差內外復思爲亂駿少子天錫因民心起兵殺邕以冠軍大將軍輔政玄靖庶母郭氏以天錫擅權與張氏疎宗謀誅之事發天錫殺玄靖而自立

天錫字純嘏一名公純私署使持節大都督大將軍護羌校尉涼州牧涼王有火然於泥中天錫驕恣姪昏不恤民務元日與嬖人褻飲既字關二羣臣朝賀又不省其母從事中郎張慮輿櫬切諫且求大覲天錫不納昭成末苻堅遣將苟萇伐涼州破之天錫降於萇初駿時謠曰劉新婦歟米石新婦炊殺羝蕩滌歟張兒張兒食之口正披是時姑臧及諸郡國童子皆歌之謂劉曜石虎並伐涼州不克至堅而降之也天錫至長安堅拜爲尙書堅敗於壽春天

錫奔建康

鮮卑乞伏國仁出於隴西其先如弗自漠北南出五代祖祐隣并兼諸部部眾漸盛父司繁擁部落降於苻堅以爲南單于又拜鎮西將軍鎮勇士川司繁死國仁代統任苻堅之伐司馬昌明以國仁爲前將軍領騎先鋒及堅之敗國仁叔步頽叛於隴右堅令國仁討之步頽大悅迎而推之招集部落眾十餘萬太祖時私署大都督大將軍大單于秦州河州牧號年建義署置官屬分部內爲十一郡築勇士城以都之國仁死

弟乾歸統事自署大都督大將軍大單于河南王改年爲太初置百官登國中遷於金城南門自壞乾歸惡之遷於苑川尋爲姚興所破又奔枹罕遂降姚興拜爲河州刺史封歸義侯尋還苑川乾歸乃背姚興私稱秦王置百官年號更始遣使請援太宗許之

後乾歸田於五谿梟集其手尋爲兄子公府所殺子熾磐殺公府代統位

熾磐自稱大將軍河南王改年爲永康後襲禿髮得檀於樂都滅之乃私署秦王置百官改年爲建洪後遣其尙書郎莫胡積射將軍乞伏又寅等貢黃金二百斤請伐赫連昌世祖許之及世祖平統萬熾磐乃遣其叔平遠將軍泥頭弟安遠將軍度質於京師又使其中書侍郎王愷丞相從事中郎烏納闐奉表貢其方物熾磐死子暮末統任

暮末字安石跋旣立改年爲永洪其尙書隴西辛進曾隨熾磐遊於後園進彈鳥丸誤傷暮末母面至是殺進五族二十七人暮末弟殊羅蒸熾磐左夫人禿髮氏暮末知而禁之殊羅懼與叔父什寅謀殺暮末禿髮氏盜門鑰於內鑰誤門者告暮末收其黨與盡

殺之欲鞭什質什質曰我負汝死不負汝鞭暮末怒劊其腹投屍於河什質母弟白養及去列頗有怨言又殺之政刑酷濫內外崩離部民多叛人思亂矣後爲赫連定所逼遣王愷烏訥闐請迎於世祖世祖許以安定以西平涼以東封之暮末乃焚城邑毀寶器率戶萬五千至高田谷爲赫連定所拒遂保南安世祖遣使迎之暮末衛將軍吉毗固諫以爲不宜內徙暮末從之赫連定遣其北平公韋伐率眾一萬攻南安城內大飢人相食神麿四年暮末及宗族五百餘人出降送於上邽

鮮卑秃髮烏孤八世祖匹孤自塞北遷於河西其地東至麥田牽屯西至濕羅南至澆河北接大漠匹孤死子壽闐統任初母孕壽闐因寢產於被中乃名秃髮其俗爲被覆之義五世祖樹機能壯果多謀略晉泰始中殺秦州刺史胡烈於高斛堆敗涼州刺史蘇

榆于金山咸寧中又斬涼州刺史楊欣於丹嶺盡有涼州之地後
爲部民沒骨所殺從弟務丸統任務丸曾孫思復犍部眾稍盛卽
烏孤父也思復犍死烏孤統任皇始初呂光拜烏孤益州牧左賢
王烏孤私署大都督大將軍大單于西平王年號太初天興初烏
孤又稱武威王徙治樂都置車騎將軍已下分立郡縣烏孤因酒
走馬馬倒傷脇笑曰幾爲呂光父子所喜旣而遂死

弟涼州牧西平公利鹿孤統任徙治西平改年建和使使朝貢遣
弟車騎將軍儁檀拒呂纂纂士馬精銳軍人大懼儁檀下馬據胡
牀以安眾情乃貫甲交戰破纂軍二千餘級利鹿孤私署百官自
丞相以下利鹿孤死

儁檀統任私署涼王還居樂都年號洪昌遣使朝貢天賜中儁檀
詐降姚興興以儁檀爲涼州刺史遂據姑臧與沮渠蒙遜戰於均

石爲蒙遜所敗，僂檀又爲赫連屈丐所破，於陽武以數千騎奔南山。幾爲追騎所得，懼東西寇至，乃徙三百里內民於姑臧。姚興乘釁遣將姚弼等至於城下，僂檀驅牛羊於野，弼眾採掠。僂檀因分擊大破之，弼乃退還。僂檀又自署涼王，署百官，改號嘉平。永興中，盡眾代沮渠蒙遜爲蒙遜，所敗於窮泉，單馬歸姑臧。懼蒙遜所滅，乃遷于樂都。蒙遜以兵圍之，築室反耕，爲持久之計。僂檀以子保周爲質於蒙遜，蒙遜乃還。神瑞初，僂檀率騎擊乙弗虜，大有擒獲，而乞伏熾磐乘虛襲樂都，克之。執僂檀子虎臺以下。僂檀聞之曰：「若歸熾磐，便爲奴僕，豈忍見妻子在他懷中也？」引眾而西，眾皆離散。僂檀曰：「蒙遜熾磐皆委質於吾，今而歸之，不亦鄙哉？」四海之廣，無所容身，何其痛乎！旣乃歎曰：「吾老矣，寧見妻子而死。」遂降熾磐。熾磐待以上賓之禮，用爲驃騎大將軍，封左南公。歲餘，鳩殺之。

傳檀少子賀後來奔自有傳

李暠字玄盛小字長生隴西狄道人也漢前將軍廣之後曾祖柔
晉相國從事中郎北地太守祖太張祚武衛將軍父昶早卒暠遺
腹子也皇始中呂光建康太守段業自稱涼州牧以敦煌太守孟
敏爲沙州刺史暠爲效穀令敏死敦煌護軍郭謙等推暠爲寧朔
將軍敦煌太守業私稱涼王暠詐臣於業業以暠爲鎮西將軍天
興中暠私署大都督大將軍護羌校尉秦涼二州牧涼公年號庚
子居敦煌遣使朝貢天賜中改年建初遷於酒泉歲脩職貢暠死
子歆統任

歆字士業自稱大都督大將軍護羌校尉涼州牧涼公號年嘉興
元年大破沮渠蒙遜於解支澗獲七千餘級遣使朝貢歆聞蒙遜
南伐乞伏乃起兵攻張掖其母尹氏謂歆曰汝新造之國地狹民

希蒙遜驍武汝非其敵吾觀其數年以來經謀規略有兼并之志
且天時人事似欲歸之度德量力春秋之義先王遺令深慎兵戰
保境寧民俟時而動言猶在耳奈何忘之汝必行也非唯師敗國
亦亾矣歆不從遂率步騎三萬東伐次于都瀆湖蒙遜自浩疊拒
歆戰于懷城爲蒙遜所敗左右勸歆還酒泉歆曰吾違太后明敕
遠取敗辱不殺此胡復何面目見吾母也勒眾復戰敗于蓼泉爲
蒙遜所殺蒙遜遂克酒泉歆之未敗有一大蛇從南門而入至歆
恭德殿前有雙雉飛出宮內通街大樹上有烏鵲爭巢鵲爲烏所
殺敦煌父老令狐熾夢一白頭公衿衣而謂曰南風動吹長木胡
桐椎不中轂言訖忽然不見歆小字桐椎至是而亾

歆弟敦煌太守恂復自立于敦煌稱冠軍將軍涼州刺史蒙遜攻
恂于敦煌三面起堤以水灌城恂請降不許城陷恂自殺蒙遜克

敦煌恂兄翻子寶後入國自有傳

胡沮渠蒙遜本出臨松盧水其先爲匈奴左沮渠遂以官爲氏蒙遜滑稽有權變頗曉天文爲諸胡所歸呂光殺其伯父西平太守羅仇蒙遜聚眾萬餘屯於金山與從兄晉昌太守男成共推建康太守段業爲使持節大都督龍驤大將軍涼州牧建康公稱神璽元年業以蒙遜爲張掖太守封臨池侯男成爲輔國將軍委以軍國之任業自稱涼王以蒙遜爲尙書左丞忌蒙遜威名微疎遠之天興四年蒙遜內不自安請爲安西太守蒙遜欲激怒其眾乃密誣告男成叛逆業殺之蒙遜泣告眾陳欲復讎之意男成素有恩信眾情怨憤泣而從之蒙遜因舉兵攻殺業私署使持節大都督大將軍涼州牧張掖公號年永安居張掖永興中蒙遜克姑臧遷之改號玄始元年自稱河西王置百官丞郎以下頻遣使朝貢蒙

遜寢於新臺闈人王懷祖斫蒙遜傷足蒙遜妻孟氏擒懷祖斬之
蒙遜聞劉裕滅姚泓怒甚有校書郎言事於蒙遜蒙遜曰汝聞劉
裕入關敢妍妍然也遂殺之其峻暴如此太常中蒙遜克李歆尋
滅燉煌後改年承玄神廟中遣尙書郎宗舒左常侍高猛朝貢上
表曰伏惟陛下天縱叡聖德超百王陶育齊於二儀洪基隆於三
代然鍾運多難九服紛擾神旗暫擁車書未同上靈降祐祚歸有
道純風一鼓殊方革面羣生幸甚茲土齊欣臣誠弱才效無可錄
幸遇重光思竭力命自欣投老得覩盛化冀終餘年憑倚皇極前
後奉表貢使相望去者杳然寂無旋返未審津塗寇險竟不仰達
爲天朝高遠未蒙齒錄屏營戰灼無地自措往年侍郎郭祗等還
奉被詔書三接之恩始隆萬里之心有賴今極難之餘開泰唯始
誘勸旣加引納彌篤老臣見存遐外無棄仰荷愷悌之仁俯蹈康

哉之詠然商胡後至奉公卿書援引歷數安危之機厲以竇融知
命之美顧惟情願實深悚惕何者臣不自揆遠託大蔭庶微誠上
宣天鑒下降若萬國來庭百辟陞賀高蹈先至之端獨步知機之
首但世難尙殷情願未遂章表頻脩滯懷不暢許身於國款誠莫
表致惑羣后貽慮公卿辭旨紛紜抑引重沓不在同獎之例未達
拱辰之心延首一隅低回四極臣歷觀符瑞候察天時未有過於
皇魏踰於陛下加以靈啟聖姿幼登天位美詠侔於成康道化踰
於文景方將振神綱以掩六合灑玄澤以潤八荒況在秦隴茶炭
之餘直是老臣盡效之會後蒙遜遣子安周內侍世祖遣兼太常
李順持節拜蒙遜爲假節加侍中都督涼州西域羌戎諸軍事太
傅行征西大將軍涼州牧涼王冊曰昔我皇祖胄自黃軒總御羣
才攝服戎夏疊曜重光不殞其舊逮于太祖應期協運大業唯新

奄有區宇受命作魏降及太宗廣闢崇基政和民阜朕承天緒思
廓宇縣然時運或否雰霧四張赫連跋扈於關西大檀陸梁於漢
北戎夷負阻江淮未賓是用自東徂西戎軒屢駕賴宗廟靈長將
士宣力克翦兇渠震服疆獷四方漸泰表裏無塵王先識機運經
略深遠與朕協同厥功洪茂當今運鍾時季僭逆憑陵有土者莫
不跨峙一隅有民者莫不榮其私號不遵眾星拱極之道不慕細
流歸海之義而王深悟大體率由典章任土貢珍愛子入侍勲義
著焉道業存焉惟王乃祖乃父有土有民論功德則無二於當時
言氏族則始因於世爵古先帝王褒賢賞德莫不胙土分民建爲
藩輔是以周成命太公以表東海襄王錫晉文大啟南陽是用割
涼州之武威張掖敦煌酒泉西海金城西平七郡封王爲涼王受
茲素土苴以白茅用建冢社爲魏室藩輔盛衰存亾與魏升降夫

功高則爵尊德厚則任重又加命王入贊百揆謀謨幃幄出征不
懷登攝侯伯其以太傅行征西大將軍仗鉞秉旄鷹揚河右遠祛
王略懷柔荒隅北盡于窮髮南極於庸岷西被于岷嶺東至于河
曲王實征之以夾輔皇室又命王建國署將相羣卿百官承制假
授除文官刺史以還武官撫軍以下建天子旌旗出入警蹕如漢
初諸侯王故事欽哉惟時往踐乃職祇服朕命協亮天工俾九德
咸事無忝庶官用終爾顯德對揚我皇祖之休烈崔浩之辭也蒙
遜又改稱義和元年延和二年四月蒙遜死遣使監護喪事諡曰
武宣王蒙遜性姪忍於刑戮閨庭之中略無風禮

第三子牧犍統任自稱河西王遣使請朝命先是世祖遣李順迎
蒙遜女爲夫人會蒙遜死牧犍受蒙遜遺意送妹於京師拜右昭
儀改稱承和元年世祖又遣李順拜牧犍使持節侍中都督涼沙

河三州西域羌戎諸軍事車騎將軍開府儀同三司領護西戎校尉涼州刺史河西王牧犍以無功受賞乃留順上表乞安平一號優詔不許牧犍尙世祖妹武威公主遣其相宋繇表謝獻馬五百匹黃金五百斤繇又表請公主及牧犍母妃后定號朝議謂禮母以子貴妻從夫爵牧犍母宜稱河西國太后公主於其國內可稱王后於京師則稱公主詔從之牧犍遣其將軍沮渠旁周朝京師世祖遣侍中古弼尙書李順賜其侍臣衣服有差并徵世子封壇入侍牧犍乃遣封壇朝於京師太延五年世祖遣尙書賀多羅使涼州且觀虛實以牧犍雖稱蕃致貢而內多乖悖於是親征之詔公卿爲書讓之曰王外從正朔內不捨僭罪一也民籍地圖不登公府任土作貢不入司農罪二也旣荷王爵又受僞官取兩端之榮邀不二之寵罪三也知朝廷志在懷遠固違聖略切稅商胡以

斷行旅罪四也揚言西戎高自驕大罪五也坐自封殖不欲入朝
罪六也北託叛虜南引仇池憑援谷軍提挈爲姦罪七也承勅過
限輒假征鎮罪八也欣敵之全幸我之敗侮慢王人供不以禮罪
九也旣婚帝室寵踰功舊方恣愆情蒸淫其嫂罪十也旣違伉儷
之體不篤婚姻之義公行醜毒規害公主罪十一也備防王人候
守關要有如寇讎罪十二也爲臣如其可恕乎先令後誅王者
之典也若親率羣臣委贄郊迎謁拜馬首上策也六軍旣臨面縛
輿觀又其次也如其守迷窮城不時悛悟身死族滅爲世大戮宜
思厥中自求多福也官軍濟河牧犍曰何故爾也用其左丞姚定
國計不肯出迎求救於蠕蠕又遣弟董來率兵萬餘人拒官軍於
城南戰退車駕至姑臧遣使喻牧犍令出牧犍聞蠕蠕內侵於善
無幸車駕返旆遂嬰城自守牧犍兄子祖踰城出降具知其情世

祖乃引諸軍進攻牧犍兄子萬年率麾下又來降城拔牧犍與左
右文武面縛請罪詔釋其縛徙涼州民三萬餘家于京師初太延
中有一父老投書於敦煌城東門忽然不見其書一紙八字文曰
涼王三十年若七年又於震電之所得石丹書曰河西河西三十
年破帶石樂七年帶石山名在姑臧南山祀傍泥陷不通牧犍征
南大將軍董來曰祀豈有知乎遂毀祀伐木通道而行牧犍立果
七年而滅如其言牧犍媵嫂李氏兄弟三人傳嬖之李與牧犍姊
其毒公主上遣解毒醫乘傳救公主得愈上徵李氏牧犍不遣厚
送居於酒泉上大怒既克猶以妹壻待之其母死以王太妃禮葬
焉又爲蒙遜置守墓三十家改授牧犍征西大將軍王如故初官
軍未入之閒牧犍使人斫開府庫取金銀珠玉及珍奇器物不更
封閉小民因之入盜巨細蕩盡有司求賊不得真君八年其所親

人及守藏者告之上乃窮竟其事搜其家中悉得所藏器物又告
牧犍父子多畜毒藥前後隱竊殺人乃有百數姊妹皆爲左道朋
行婢佚曾無愧顏始罽賓沙門曰曇無讖東入鄯善自云能使鬼
治病令婦人多子與鄯善王妹曼頭陁林私通發覺亾奔涼州蒙
遜寵之號曰聖人曇無讖以男女交接之術教授婦人蒙遜諸女
子婦皆往受法世祖聞諸行人言曇無讖之術乃召曇無讖蒙遜
不遣遂發露其事拷訊殺之至此帝知之於是賜昭儀沮渠氏死
誅其宗族唯萬年及祖以前先降得免是年人又告牧犍猶與故
臣民交通謀反詔司徒崔浩就公主第賜牧犍死牧犍與主訣良
久乃自裁葬以王禮諡曰哀王及公主薨詔與牧犍合葬公主無
男有女以國甥親寵得襲母爵爲武威公主

蒙遜子秉字季義世祖以其父故拜東雍州刺史險詖多端眞君

中遂與河東蜀薛安都謀逆至京師付其兄弟扼而殺之

萬年祖並以先降萬年拜安西將軍張掖王祖爲廣武公萬年後爲冀定二州刺史復坐謀逆與祖俱死初牧犍之敗也弟樂都太守安周南奔吐谷渾世祖遣鎮南將軍奚眷討之牧犍弟酒泉太守無諱奔晉昌乃使弋陽公元絜守酒泉眞君初無諱圍酒泉絜輕之出城與語爲無諱所執絜所部相率固守無諱仍圍之糧盡爲無諱所陷無諱又圍張掖不能克退保臨松遂還世祖下詔喻之時永昌王健鎮涼州無諱使其中尉梁偉詣健求奉酒泉又送絜及統帥兵士于健軍二年春世祖遣兼鴻臚持節策拜無諱爲征西大將軍涼州牧酒泉王尋以無諱復規叛逆復遣鎮南將軍南陽公奚眷討酒泉克之無諱遂謀渡流沙遣安周西擊鄯善鄯善王恐懼欲降會魏使者勸令拒守安周遂與連戰不能克退保

東城三年春鄯善王比龍西奔且末其世子乃從安周鄯善大亂無諱遂渡流沙士卒渴死者大半仍據鄯善先是高昌太守闕爽爲李寶舅唐契所攻聞無諱至鄯善遣使詐降欲令無諱與唐契相擊無諱留安周住鄯善從焉耆東北趣高昌會蠕蠕殺唐契爽拒無諱無諱將衛興奴詐誘爽遂屠其城爽奔蠕蠕無諱因留高昌五年夏無諱病死安周代立後爲蠕蠕國所并

史臣曰周德之衰七雄競時咸分割神州睥睨尊極至是張寔等介在人外地實戎墟大爭鴟張潛懷不遜其不知量固爲甚矣虵虺相噬終爲擒滅宜哉

魏書卷一百

列傳第八十八

高句麗

百濟

勿吉

失韋

豆莫婁

地豆于

庫莫奚

契丹

烏洛侯

高句麗者出於夫餘自言先祖朱蒙朱蒙母河伯女爲夫餘王閉

於室中爲日所照引身避之日影又逐旣而有孕生一卵大如五升夫餘王棄之與犬犬不食棄之與豕豕又不食棄之於路牛馬避之後棄之野眾鳥以毛茹之夫餘王割剖之不能破遂還其母其母以物裹之置於暖處有一男破殼而出及其長也字之曰朱蒙其俗言朱蒙者善射也夫餘人以朱蒙非人所生將有異志請除之王不聽命之養馬朱蒙每私試知有善惡駿者減食令瘦駑者善養令肥夫餘王以肥者自乘以瘦者給朱蒙後狩于田以朱蒙善射限之一矢朱蒙雖矢少殪獸甚多夫餘之臣又謀殺之朱蒙母陰知告朱蒙曰國將害汝以汝才略宜遠適四方朱蒙乃與烏引烏違等二人棄夫餘東南走中道遇一大水欲濟無梁夫餘人追之甚急朱蒙告水曰我是日子河伯外孫今日逃走追兵垂及如何得濟於是魚鼈並浮爲之成橋朱蒙得渡魚鼈乃解追騎

不得渡朱蒙遂至普述水遇見三人其一人著麻衣一人著衲衣
一人著水藻衣與朱蒙至紇升骨城遂居焉號曰高句麗因以爲
氏焉初朱蒙在夫餘時妻懷孕朱蒙逃後生一子字始閻諧及長
知朱蒙爲國主卽與母亾而歸之名之曰閻達委之國事朱蒙死
閻達代立閻達死子如栗代立如栗死子莫來代立乃征夫餘夫
餘大敗遂統屬焉莫來子孫相傳至裔孫宮生而開目能視國人
惡之及長凶虐國以殘破宮曾孫位宮亦生而視人以其似曾祖
宮故名爲位宮高句麗呼相似爲位位宮亦有勇力便弓馬魏正
始中入寇遼西安平爲幽州刺史毋丘儉所破其玄孫乙弗利利
子釗烈帝時與慕容氏相攻擊建國四年慕容元眞率眾伐之入
自南陝戰於木底大破釗軍乘勝長驅遂入丸都釗單馬奔竄元
眞掘釗父墓載其屍并掠其母妻珍寶男女五萬餘口焚其宮室

毀丸都城而還自後釗遣使來朝阻隔寇讎不能自達釗後爲百濟所殺世祖時釗曾孫璉始遣使者安東奉表貢方物并請國諱世祖嘉其誠款詔下帝系名諱於其國遣員外散騎侍郎李敖拜璉爲都督遼海諸軍事征東將軍領護東夷中郎將遼東郡開國公高句麗王敖至其所居平壤城訪其方事云遼東南一千餘里東至柵城南至小海北至舊夫餘民戶參倍於前魏時其地東西二千里南北一千餘里民皆土著隨山谷而居衣布帛及皮土田薄墾蠶農不足以自供故其人節飲食其俗姪好歌舞夜則男女羣聚而戲無貴賤之節然潔淨自喜其王好治宮室其官名有謁奢太奢大兄小兄之號頭著折風其形如弁旁插烏羽貴賤有差立則反拱跪拜曳一脚行步如走常以十月祭天國中大會其公會衣服皆錦繡金銀以爲飾好蹲踞食用俎几出三尺馬云本朱

蒙所乘馬種卽果下也後貢使相尋歲致黃金二百斤白銀四百斤時馮文通率眾奔之世祖遣散騎常侍封撥詔璉令送文通璉上書稱當與文通俱奉王化竟不送世祖怒欲往討之樂平王不
等議待後舉世祖乃止而文通亦尋爲璉所殺後文明太后以顯祖六宮未備勅璉令薦其女璉奉表云女已出嫁求以弟女應旨
朝廷許焉乃遣安樂王眞尙書李敷等至境送幣璉惑其左右之
說云朝廷昔與馮氏婚姻未幾而滅其國殷鑒不遠宜以方便辭
之璉遂上書妄稱女死朝廷疑其矯詐又遣假散騎常侍程駿切
責之若女審死者聽更選宗淑璉云若天子恕其前愆謹當奉詔
會顯祖崩乃止至高祖時璉貢獻倍前其報賜亦稍加焉時光州
於海中得璉所遣詣蕭道成使餘奴等送闕高祖詔責璉曰道成
親殺其君竊號江左朕方欲興滅國於舊邦繼絕世於劉氏而卿

越境外交遠通篡賊豈是藩臣守節之義今不以一過掩卿舊款
卽送還藩其感恕思愆祇承明憲輯寧所部動靜以聞太和十五
年璉死年百餘歲高祖舉哀於東郊遣謁者僕射李安上策贈車
騎大將軍太傅遼東郡開國公高句麗王諡曰康又遣大鴻臚拜
璉孫雲使持節都督遼海諸軍事征東將軍領護東夷中郎將遼
東郡開國公高句麗王賜衣冠服物車旗之飾又詔雲遣世子入
朝令及郊丘之禮雲上書辭疾惟遣其從叔升于隨使詣闕嚴責
之自此歲常貢獻正始中世祖於東堂引見其使芮悉弗悉弗進
曰高麗係誠天極累葉純誠地產土毛無愆王貢但黃金出自夫
餘珂則涉羅所產今夫餘爲勿吉所逐涉羅爲百濟所并國王臣
雲惟繼絕之義悉遷于境內二品所以不登王府實兩賊是爲世
宗曰高麗世荷上將專制海外九夷黠虜實得征之瓶罄罍恥誰

之咎也昔方貢之愆責在連率卿宜宣朕旨於卿主務盡威懷之略揃披害羣輯寧東裔使二邑還復舊墟土毛無失常貢也神龜中雲死靈太后爲舉哀於東堂遣使策贈車騎大將軍領護東夷校尉遼東郡開國公高句麗王又拜其世子安爲安東將軍領護東夷校尉遼東郡開國公高句麗王正光初光州又於海中執得蕭衍所授安寧東將軍衣冠劍佩及使人江法盛等送於京師安死子延立出帝初詔加延使持節散騎常侍車騎大將軍領護東夷校尉遼東郡開國公高句麗王賜衣冠服物車旗之飾天平中詔加延侍中驃騎大將軍餘悉如故延死子成立訖於武定末其貢使無歲不至

百濟國其先出自夫餘其國北去高句麗千餘里處小海之南其民土著地多下溼率皆山居有五穀其衣服飲食與高句麗同延

興二年其王餘慶始遣使上表曰臣建國東極豺狼隔路雖世承
靈化莫由奉藩瞻望雲闕馳情罔極涼風微應伏惟皇帝陛下協
和天休不勝係仰之情謹遣私署冠軍將軍駙馬都尉弗斯侯長
史餘禮龍驤將軍帶方太守司馬張茂等投舫波阻搜徑玄津託
命自然之運遣進萬一之誠冀神祇垂感皇靈洪覆克達天庭宣
暢臣志雖旦聞夕沒永無餘恨又云臣與高句麗源出夫餘先世
之時篤崇舊款其祖釗輕廢隣好親率士眾陵踐臣境臣祖須整
旅電邁應機馳擊矢石暫交梟斬釗首自爾已來莫敢南顧自馮
氏數終餘燼奔竄醜類漸盛遂見陵逼構怨連禍三十餘載財殫
力竭轉自孱踈若天慈曲矜遠及無外速遣一將來救臣國當奉
送鄙女執掃後宮并遣子弟牧圉外廩尺壤匹夫不敢自有又云
今璉有罪國自魚肉大臣彊族戮殺無已罪盈惡積民庶崩離是

滅亾之期假手之秋也且馮族士馬有烏畜之戀樂浪諸郡懷首
丘之心天威一舉有征無戰臣雖不敏志效畢力當率所統承風
響應且高麗不義逆詐非一外慕隗囂藩罕之辭內懷兇禍豕突
之行或南通劉氏或北約蠕蠕其相唇齒謀陵王略昔唐堯至聖
致罰丹水孟嘗稱仁不捨塗詈涓流之水宜早壅塞今若不取將
貽後悔去庚辰年後臣西界小石山北國海中見屍十餘并得衣
器鞍勒視之非高麗之物後聞乃是王人來降臣國長蛇隔路以
沈于海雖未委當深懷憤恚昔宋戮申舟楚莊徒跣鵠撮放鳩信
陵不食克敵建名美隆無已夫以區區偏鄙猶慕萬代之信況陛
下合氣天地勢傾山海豈令小豎跨塞天達今上所得鞍一以爲
實驗顯祖以其僻遠冒險朝獻禮遇優厚遣使者邵安與其使俱
還詔曰得表聞之無恙甚喜卿在東隅處五服之外不遠山海歸

誠魏闕欣嘉至意用戢于懷朕承萬世之業君臨四海統御羣生
今宇內清一八表歸義襁負而至者不可稱數風俗之和士馬之
盛皆餘禮等親所聞見卿與高麗不穆屢致陵犯苟能順義守之
以仁亦何憂於寇讎也前所遣使浮海以撫荒外之國從來積年
往而不返存亡達否未能審悉卿所送鞍比較舊乘非中國之物
不可以疑似之事以生必然之過經略權要已具別旨又詔曰知
高麗阻疆侵軼卿土修先君之舊怨棄息民之大德兵交累載難
結荒邊使兼申胥之誠國有楚越之急乃應展義扶微乘機電舉
但以高麗稱藩先朝供職日久於彼雖有自昔之釁於國未有犯
令之愆卿使命始通便求致伐尋討事會理亦未周故往年遣禮
等至平壤欲驗其由狀然高麗奏請頻煩辭理俱詣行人不能抑
其請司法無以成其責故聽其所啟詔禮等還若今復違旨過

咎益露後雖自陳無所逃罪然後興師討之於義爲得九夷之國
世居海外道暢則奉藩惠戢則保境故羈縻著於前典楛貢曠於
歲時卿備陳疆弱之形具列往代之迹俗殊事異擬貺乖衷洪規
大略其致猶在今中夏平一字內無虞每欲陵威東極懸旌域表
拯荒黎於偏方舒皇風於遠服身由高麗卽敘未及卜征今若不
從詔旨則卿之來謀載協朕意元戎啟行將不云遠便可豫率同
興具以待事時遣報使速究彼情師舉之日卿爲鄉導之首大捷
之後又受元功之賞不亦善乎所獻錦布海物雖不悉達明卿至
心今賜雜物如別又詔璉護送安等安等至高句麗璉稱昔與餘
慶有讎不令東過安等於是皆還乃下詔切責之五年使安等從
東萊浮海賜餘慶璽書褒其誠節安等至海濱遇風飄蕩竟不達
而還

勿吉國在高句麗北舊肅慎國也邑落各自有長不相總一其人勁悍於東夷最彊言語獨異常輕豆莫婁等國諸國亦患之去洛五千里自和龍北二百餘里有善玉山山北行十三日至祁黎山又北行七日至如洛瓊水水廣里餘又北行十五日至太魯水又東北行十八日到其國國有大水濶三里餘名速末水其地下溼築城穴居屋形似塚開口於上以梯出入其國無牛有車馬佃則偶耕車則步推有粟及麥稌菜則有葵水氣鹹凝鹽生樹上亦有鹽池多膾無羊嚼米醞酒飲能至醉婦人則布裙男子膾犬皮裘初婚之夕男就女家執女乳而罷便以爲定仍爲夫婦俗以人溺洗手面頭插虎豹尾善射獵弓長三尺箭長尺二寸以石爲鏃其父母春夏死立埋之塚上作屋不令雨溼若秋冬以其屍捕貂貂食其肉多得之常七八月造毒藥傅箭鏃射禽獸中者便死煮藥

毒氣亦能殺人國南有徒太山魏言太白有虎豹羆狼不害人人
不得山上洩汗行逕山者皆以物盛去延興中遣使乙力支朝獻
太和初又貢馬五百匹乙力支稱初發其國乘船泝難河西上至
太涂河沈船於水南出陸行渡洛孤水從契丹西界達和龍自云
其國先破高句麗十落密其百濟謀從水道并力取高句麗遣乙
力支奉使大國請其可否詔敕三國同是藩附宜其和順勿相侵
擾乙力支乃還從其來道取得本船汎達其國九年復遣使侯尼
支朝獻明年復入貢其傍有大莫盧國覆鍾國莫多回國庫婁國
素和國具弗伏國匹黎余國拔大何國郁羽陵國庫伏真國魯婁
國羽真侯國前後各遣使朝獻太和十二年勿吉復遣使貢楛矢
方物於京師十七年又遣使人婆非等五百餘人朝獻景明四年
復遣使俟力歸等朝貢自此迄于正光貢使相尋余後中國紛擾

頗或不至興和二年六月遣使石久云等貢方物至於武定不絕
失韋國在勿吉北千里去洛六千里路出和龍北千餘里入契丹
國又北行十日至啜水又北行三日有蓋水又北行三日有犢了
山其山高大周回三百餘里又北行三日有大水名屈利又北行
三日至刃水又北行五日到其國有大水從北而來廣四里餘名
捺水國土下溼語與庫莫奚契丹豆莫婁國同頗有粟麥及稌唯
食豬魚養牛馬俗又無羊夏則城居冬逐水草亦多貂皮丈夫索
髮用角弓其箭尤長女婦束髮作叉手髻其國少竊盜盜一徵三
殺人者責馬三百匹男女悉衣白鹿皮襦袴有麴釀酒俗愛赤珠
爲婦人飾穿挂於頸以多爲貴女不得此乃至不嫁父母死男女
眾哭三年屍則置於林樹之上武定二年四月始遣使張焉豆伐
等獻其方物迄武定末貢使相尋

豆莫婁國在勿吉國北千里去洛六千里舊北扶餘也在失韋之東東至於海方二千里其人士著有宮室倉庫多山陵廣澤於東夷之域最爲平敞地宜五穀不生五果其人長大性彊勇謹厚不寇抄其君長皆以六畜名官邑落有豪帥飲食亦用俎豆有麻布衣制類高麗而幅大其國大人以金銀飾之用刑嚴急殺人者死沒其家人爲奴婢俗婬尤惡妬婦妬者殺之尸其國南山上至腐女家欲得輸牛馬乃與之或言本穢貊之地也

地豆于國在失韋西千餘里多牛羊出名馬皮爲衣服無五穀唯食肉酪延興二年八月遣使朝貢至于太和六年貢使不絕十四年頻來犯塞高祖詔征西大將軍陽平王頤擊走之自後時朝京師迄武定末貢使不絕

庫莫奚國之先東部宇文之別種也初爲慕容元真所破遺落者

竄匿松漠之間其民不絜淨而善射獵好爲寇鈔登國三年太祖
親自出討至弱洛水南大破之獲其四部落馬牛羊豕十餘萬帝
曰此羣狄諸種不識德義互相侵盜有犯王略故往征之且鼠竊
狗盜何足爲患今中州大亂吾先平之然後張其威懷則無所不
服矣旣而車駕南還雲中懷服燕趙十數年間諸種與庫莫奚亦
皆滋盛乃開遼海置戍和龍諸夷震懼各獻方物高宗顯祖世庫
莫奚歲致名馬文皮高祖初遣使朝貢太和四年輒入塞內辭以
畏地豆于鈔掠詔書切責之二十二年入寇安州營燕幽三州兵
數千人擊走之後復款附每求入塞與民交易詔曰庫莫奚去太
和二十一年以前與安營二州邊民參居交易往來並無疑貳至
二十二年叛逆以來遂爾遠竄今雖款附猶在塞表每請入塞與
民交易若抑而不許乖其歸向之心聽而不虞或有萬一之警不

容依先任其交易事宜限節交市之日州遣上佐監之自是已後歲常朝獻至於武定末不絕

契丹國在庫莫奚東異種同類俱竄於松漠之間登國中國軍大破之遂逃迸與庫莫奚分背經數十年稍滋蔓有部落於和龍之北數百里多爲寇盜眞君以來求朝獻歲貢名馬顯祖時使莫弗紇何辰奉獻得班饗於諸國之末歸而相謂言國家之美心皆忻慕於是東北羣狄聞之莫不思服悉萬丹部何大何部伏弗郁部羽陵部日連部匹絜部黎部吐六于部等各以其名馬文皮入獻天府遂求爲常皆得交市於和龍密雲之間貢獻不絕太和三年高句麗竊與蠕蠕謀欲取地豆于以分之契丹懼其侵軼其莫弗賀勿于率其部落車三千乘眾萬餘口驅徙雜畜求入內附止於白狼水東自此歲常朝貢後告饑高祖矜之聽其入關市糴及世

宗肅宗時恆遣使貢方物熙平中契丹使人祖真等三十人還靈
太后以其俗嫁娶之際以青氊爲上服人給青氊兩匹賞其誠款
之心餘依舊式朝貢至齊受禪常不絕

烏洛侯國在地豆于之北去代都四千五百餘里其土下溼多霧
氣而寒民冬則穿地爲室夏則隨原阜畜牧多豕有穀麥無大君
長部落莫弗皆世爲之其俗繩髮皮服以珠爲飾民尙勇不爲姦
竊故慢藏野積而無寇盜好獵射樂有箜篌木槽革面施九弦
其國西北有完水東北流合于難水其地小水皆注於難東入于
海又西北二十日行有于已尼大水所謂北海也世祖眞君四年
來朝稱其國西北有國家先帝舊墟石室南北九十步東西四十
步高七十尺室有神靈民多祈請世祖遣中書侍郎李敞告祭焉
刊祝文於室之壁而還

史臣曰夷狄之於中國羈縻而已高麗歲修貢職東藩之冠榮寔
之禮致自天朝亦爲優矣其他碌碌咸知欵貢豈牛馬內向東風
入律者也

魏書卷一百
列傳第八十八終

魏書卷一百一

列傳第八十九

氏

吐谷渾

宕昌

高昌

鄧至

蠻

獠

氏者西夷之別種號曰白馬三代之際蓋自有君長而世一朝見故詩稱自彼氏羌莫敢不來王也秦漢以來世居岐隴以南漢川以西自立豪帥漢武帝遣中郎將郭昌衛廣滅之以其地爲武都

郡自汧渭抵於巴蜀種類實繁或謂之白氏或謂之故氏各有侯
王受中國封拜漢建安中有楊騰者爲部落大帥騰勇健多計略
始徙居仇池仇池方百頃因以爲號四面斗絕高七里餘羊腸蟠
道三十六回其上有豐水泉煮土成鹽騰後有名千萬者魏拜爲
百頃氏王千萬孫名飛龍漸彊盛晉武帝假平西將軍無子養外
甥令狐茂搜爲子惠帝元康中茂搜自號輔國將軍右賢王羣氏
推以爲主關中人士流移者多依之愍帝以爲驃騎將軍左賢王
茂搜死子難敵統位與弟堅頭分部曲難敵自號左賢王屯下辨
堅頭號右賢王屯河池難敵死子毅立自號使持節龍驤將軍左
賢王下辨公以堅頭子盤爲使持節冠軍將軍右賢王河池公臣
晉晉以毅爲征南將軍三年毅族兄初襲殺毅并有其眾自立爲
仇池公臣於石虎後稱藩於晉永和十年改初爲天水公十一年

毅小弟宋奴使姑子梁三王因侍直手刃殺初初子國率左右誅
三王及宋奴復自立爲仇池公桓溫表國爲秦州刺史國子安爲
武都太守十二年國從叔俊復殺國自立國子安叛苻生殺俊復
稱藩於晉安死子世自立爲仇池公晉太和三年以世爲秦州刺
史弟統爲武都太守世死統廢世子纂自立統一名德纂聚黨襲
殺統自立爲仇池公遣使詣簡文帝以纂爲秦州刺史晉咸安元
年苻堅遣楊安伐纂剋之徙其民於關中空百頃之地宋奴之死
二子佛奴佛狗逃奔苻堅堅以妻佛奴子定拜爲尙書領軍苻堅
之敗關右擾亂定盡力於堅堅死乃率眾奔隴右徙治歷城去仇
池百二十里置倉儲於百頃招夷夏得千餘家自稱龍驤將軍仇
池公稱藩於晉孝武卽以其自號假之後以爲秦州刺史登國四
年遂有秦州之地自號隴西王後爲乞伏乾歸所殺無子佛狗子

盛先爲監國守仇池乃統事自號征西將軍秦州刺史仇池公諡定爲武王分諸氏羌爲二十部護軍各爲鎮戍不置郡縣遂有漢中之地仍稱藩於晉天興初遣使朝貢詔以盛爲征南大將軍仇池王隔礙姚興不得歲通貢使盛以兄子撫爲平南將軍梁州刺史守漢中劉裕永初中封盛爲武都王盛死私諡曰惠文王子玄統位玄子黃眉號征西大將軍開府儀同三司秦州刺史武都王雖稱藩於劉義隆仍奉晉永熙之號後始用義隆元嘉正朔初盛謂玄曰吾年已老當終爲晉臣汝善事宋帝故玄奉焉玄善於待士爲流舊所懷始光四年世祖遣大鴻臚公孫軌拜玄爲征南大將軍都督梁州刺史南秦王玄上表請比內藩許之玄死私諡孝昭王子保宗統位初玄臨終謂弟難當曰今境候未寧方須撫慰保宗冲昧吾授卿國事其無墜先勳難當固辭請立保宗以輔之

保宗既立難當妻姚氏謂難當曰國險宜立長君反事孺子非久計難當從之廢保宗而自立稱藩于劉義隆難當拜保宗爲鎮南將軍鎮石昌以次子順爲鎮東將軍秦州刺史守上邽保宗謀襲難當事泄被繫先是四方流人以仇池豐實多往依附流人有許穆之郝焮之二人投難當並改姓爲司馬穆之自云名飛龍焮之自云名康之云是晉室近戚康之尋爲人所殺時劉義隆梁州刺史甄法護刑政不理義隆遣刺史蕭思話代任難當以思話未至遣將舉兵襲梁州破白馬遂有漢中之地尋而思話使其司馬蕭承之先驅進討所向剋捷遂平梁州因又附義隆難當後釋保宗遣鎮董亭保宗與兄保顯歸京師世祖拜保宗征南大將軍秦州牧武都王尚公主保顯爲鎮西將軍晉壽公後遣大鴻臚崔頤拜難當爲征南大將軍儀同三司領護西羌校尉秦梁二州牧南秦

王難當後自立爲大秦王號年曰建義立妻爲王后世子爲太子
置百官具擬天朝然猶貢獻于劉義隆不絕尋而其國大旱多災
異降大秦王復爲武都王太延初難當立鎮上邽世祖連車騎大
將軍樂平王丕等督河西高平諸軍取上邽又詔諭難當難當奉
詔攝守尋而傾國南寇規有蜀土襲義隆益州攻涪城又伐巴西
獲維州流人七千餘家還于仇池義隆怒遣將裴方明等伐之難
當爲方明所敗棄仇池與千餘騎奔上邽世祖遣中山王辰迎之
赴行宮方明旣剋仇池以保宗弟保熾守之河間公齊擊走之先
是詔保宗鎮上邽又詔鎮駱谷復其本國保宗弟文德先逃氏中
乃說保宗令叛事泄齊執保宗送京師詔難當殺之氏羌立文德
屯于濁水文德自號征西將軍秦河梁三州牧仇池公求援於義
隆義隆封文德爲武都王遣偏將房亮之等助之齊逆擊禽亮之

文德奔守葭蘆武都陰平氏多歸之詔淮陽公皮豹子等率諸軍討之文德走漢中收其妻子僚屬資糧及保宗妻公主送京師賜死初公主勸保宗反人問曰背父母之邦若何公主曰禮婦人外成因夫而榮事立據守一方我亦一國之母豈比小縣之主以此得罪高宗時拜難當營州刺史還爲外都大官卒諡曰忠子和隨父歸國別賜爵仇池公子德襲難當爵早卒子小眼襲例降爲公拜天水太守卒子大眼別有傳小眼子公熙襲爵正光中尙書右丞張普惠爲行臺送租於南秦東益普惠啟公熙俱行至南秦以氏反不得進遣公熙先慰氏東益州刺史魏子建以公熙險薄密令訪察公熙果有潛謀將爲叛亂子建仍報普惠令其攝錄普惠急追公熙竟不肯赴東出漢中普惠表列其事公熙大行賄賂終得免罪後爲假節別將與都督元志同守岐州爲秦賊莫折天生

所虜死於秦州文德後自漢中入統汧隴遂有陰平武興之地後
爲劉義隆荊州刺史劉義宣所殺保宗之執也子元和奔義隆以
爲武都白水太守元和據城歸順高宗嘉之拜征南大將軍武都
王內徙京師元和從叔僧嗣復自稱武都王於葭蘆僧嗣死從弟
文度自立爲武興王遣使歸順顯祖授文度武興鎮將旣而復叛
高祖初征西將軍皮歡喜攻葭蘆破之斬文度首文度弟弘小名
鼠犯顯祖廟諱以小名稱鼠自爲武興王遣使奉表謝罪貢其方
物高祖納之鼠遣子苟奴入侍拜鼠都督南秦州刺史征西將軍
西戎校尉武都王鼠死從子後起統任高祖復以鼠爵授之鼠子
集始爲白水太守後起死以集始爲征西將軍武都王集始後朝
于京師拜都督南秦州刺史安南大將軍領護南蠻校尉漢中郡
侯武興王賜以車旗戎馬錦綵繪纈等尋還武興進號鎮南將軍

加督寧湘等五州諸軍事後仇池鎮將楊靈珍襲破武興集始遂入蕭蹟景明初集始來降還授爵位歸守武興死子紹先立拜都督南秦州刺史征虜將軍漢中郡公武興王贈集始車騎大將軍開府儀同三司謚安王紹先年幼委事二叔集起集義夏侯道遷以漢中歸順也蕭衍白馬戍主尹天保率眾圍之道遷求援於集起集義二人貪保邊藩不欲救之唯集始弟集朗心願立功率眾破天保全漢川集朗之力也集義見梁益既定恐武興不得久爲外藩遂扇動諸氏推紹先僭稱大號集起集義並稱王外引蕭衍爲援安西將軍邢巒遣建武將軍傅豎眼攻武興剋之執紹先送于京師遂滅其國以爲武興鎮復改鎮爲東益州前後鎮將唐云樂刺史杜纂邢豹以威惠失衷氏豪仇石柱等相率反叛朝廷以西南爲憂正光中詔魏子建爲刺史以恩信招撫風化大行遠近

款附如內地焉後唐永代子建爲州未幾氏人悉反永棄城東走自此復爲氏地其後紹先奔還武興復自立爲王

吐谷渾本遼東鮮卑徒河涉歸子也涉歸一名奕洛韓有二子庶長曰吐谷渾少曰若洛廐涉歸死若洛廐代統部落別爲慕容氏涉歸之存也分戶七百以給吐谷渾吐谷渾與若洛廐二部馬鬪相傷若洛廐怒遣人謂吐谷渾曰先公處分與兄異部何不相遠而馬鬪相傷吐谷渾曰馬是畜耳食草飲水春氣發動所以鬪鬪在馬而怒及人乖別甚易今當去汝萬里之外若洛廐悔遣舊者及長史七那樓追謝留之吐谷渾曰我乃祖以來樹德遼右先公之世卜筮之言云有二子富享福祚並流子孫我是卑庶理無並大今以馬致乖殆天所啟諸君試驅馬令索馬若還東我當隨去卽令從騎擁馬令回數百步欻然悲鳴突走而西聲若頽山如是

者十餘輩一回一迷樓力屈乃跪曰可汗此非復人事渾謂其部
洛曰我兄弟子孫並應昌盛虜當傳子及曾玄孫其閒可百餘年
我及玄孫閒始當顯耳於是遂西附陰山後假道上隴若洛虜追
思吐谷渾作阿于歌徒河以兄爲阿于也子孫僭號以此歌爲輦
後鼓吹大曲吐谷渾遂徙上隴止於枹罕暨甘松南界昂城龍涸
從洮水西南極白蘭數千里中逐水草廬帳而居以肉酪爲糧西
北諸種謂之阿柴虜吐谷渾死有子六十人長子吐延身長七尺
八寸勇力過人性刻暴爲昂城羌酋姜聰所刺劍猶在體呼子葉
延語其大將紇拔塗曰吾氣絕棺歛訖便速去保白蘭地旣險遠
又土俗懦弱易控御葉延小兒欲授餘人恐倉卒終不能相制今
以葉延付汝竭股肱之力以輔之孺子得立吾無恨也抽劍而死
有子十二人葉延少而勇果年十歲縛草爲人號曰姜聰每旦輒

射之射中則嗥叫泣涕其母曰讎賊諸將已屠膾之汝年小何煩
朝朝自苦葉延嗚咽若不自勝答母曰誠知無益然罔極之心不
勝其痛性至孝母病三日不食葉延亦不食頗視書傳自謂曾祖
奕洛韓始封昌黎公吾爲公孫之子案禮公孫之子得以王父字
爲氏遂以吐谷渾爲氏焉葉延死子碎奚立性淳謹三弟專權碎
奚不能制諸大將其誅之爲憂哀不復攝事遂立子視連爲世子
委之事號曰莫賀郎華言父也碎奚遂以憂死視連立以父憂思
不遊娛酣宴十五年死弟視熊立死子樹洛干等並幼弟烏紇提
立而妻樹洛干母生二子慕瓚利延烏紇提一名大孩死樹洛干
立自號車騎將軍是歲晉義熙初也樹洛干死弟阿豺立自號驃
騎將軍沙州刺史部內有黃沙周回數百里不生草木因號沙州
阿豺兼并羌氏地方數千里號爲彊國田于西彊山觀墊江源問

於羣臣曰此水東流有何名由何郡國入何水也其長史曾和曰此水經仇池過晉壽出宕渠號墊江至巴郡入江度廣陵會於海阿豺曰水尙知有歸吾雖塞表小國而獨無所歸乎遣使通劉義符獻其方物義符封爲澆河公未及拜受劉義隆元嘉三年又加除命又將遣使朝貢會暴病臨死召諸子弟告之曰先公車騎捨其子虔以大業屬吾吾豈敢忘先公之舉而私於緯代其以慕瓚繼事阿豺有子二十人緯代長子也阿豺又謂曰汝等各奉吾一隻箭折之地下俄而命母弟慕利延曰汝取一隻箭折之慕利延折之又曰汝取十九隻箭折之延不能折阿豺曰汝曹知否單者易折眾則難摧戮力一心然後社稷可固言終而死兄子慕瓚立先是阿豺時劉義隆命竟未至而死慕瓚又奉表通義隆義隆又授隴西公慕瓚招集秦涼兇業之人及羌戎雜夷眾至五六百落

南通蜀漢北交涼州赫連部眾轉盛世祖時慕瓚始遣其侍郎謝
太寧奉表歸國尋討禽赫連定送之京師世祖嘉之遣使者策拜
慕瓚爲大將軍西秦王慕瓚表曰臣誠庸弱敢竭情款俘禽僭逆
獻捷王府爵秩雖崇而土不增廓車旗旣飾而財不周賞願垂鑒
察亮其單款臣頃接寇逆疆境之人爲賊所抄流轉東下今皇化
混一求還鄉土乞拂曰連窟略寒張華等三人家弱在此分乖可
愍願并勅遣使恩洽遐荒存亾感戴世祖詔公卿朝會議答施行
太尉長孫嵩及議郎博士二百七十九人議曰前者有司處以爲
秦王荒外之君本非政教所及來則受之去則不禁皇威遠被西
秦王慕義畏威稱臣納貢求受爵號議者以爲古者要荒之君雖
人土眾廣而爵不擬華夏陛下加寵王官乃越常分容飾車旗班
同上國至於繪絮多少舊典所無皆當臨時以制豐寡自漢魏以

來撫接荒遐頗有故事呂后遺單于御車二乘馬二駟單于答馬

千匹其後匈奴和親敵國遺繒絮不過數百呼韓邪稱臣身自入

朝始至萬匹

宋本作方伯

今西秦王若以土無桑蠶便當上請不得言財

石周賞昔周室衰微齊侯小白一匡天下有賜胙之命無益土之

賞晉侯重耳破楚城濮唯受南陽之田爲朝宿之邑西秦所致唯

定而已塞外之人因時乘便侵入秦涼未有經略拓境之勳爵登

上國統秦涼河沙四州之地而云土不增廓比聖朝於弱周而自

同於五霸無厭之情其可極乎西秦王忠款於朝廷原其本情必

不至此或左右不敏因致斯累檢西秦流人賊時所抄悉在蒲坂

今旣稱藩四海咸泰天下一家可勅秦州送詣京師隨後遣還所

請乞佛三人昔爲賓國之使來在王庭國破家遷卽爲臣妾可勿

聽許制曰公卿之議未爲失體西秦王所收金城枹罕隴西之地

彼自取之朕卽與之便是裂土何須復廓西秦款至綿緡隨使疎
數增益之非一匹而已自是慕瓚貢獻頗簡又通于劉義隆義隆
封爲隴西王太延二年慕瓚死弟慕利延立詔遣使者策諡慕瓚
曰惠王後拜慕利延鎮西大將軍儀同三司改封西平王以慕瓚
子元緒爲撫軍將軍時慕利延又通劉義隆義隆封爲河南王世
祖征涼州慕利延懼遂率其部人西遁沙漠世祖以慕利延兄有
禽赫連定之功遣使宣喻之乃還後慕利延遣使表謝書奏乃下
詔褒獎之慕利延兄子緯代懼慕利延害已與使者謀欲歸國慕
利延覺而殺之緯代弟叱力延等八人逃歸京師請兵討慕利延
世祖拜叱力延歸義王詔晉王伏羅率諸將討之軍至大母橋慕
利延兄子拾寅走河西伏羅遣將追擊之斬首五千餘級慕利延
走白蘭慕利延從弟伏念長史鴉鳩黎部大崇娥等率眾一萬三

千落歸降後復遣征西將軍高涼王那等討之於白蘭慕利延遂
入于闐國殺其王死者數萬人南征罽賓遣使通劉義隆求援獻
烏丸帽女國金酒器胡王金釧等物義隆賜以牽車七年遂還舊
土慕利延死樹洛干子拾寅立始邑於伏羅川其居止出入竊擬
王者拾寅奉脩貢職受朝廷正朔又受劉義隆封爵號河南王世
祖遣使拜爲鎮西大將軍沙州刺史西平王後拾寅自恃險遠頗
不恭命通使于劉彧獻善馬四角羊彧加之官號高宗時定陽侯
曹安表拾寅今保白蘭多有金銀牛馬若擊之可以大獲議者咸
以先帝忿拾寅兄弟不穆使晉王伏羅高涼王那再征之竟不能
剋拾寅雖復遠遁軍亦疲勞今在白蘭不犯王塞不爲人患非國
家之所急也若遣使招慰必求爲臣妾可不勞而定也王者之於
四荒羈縻而已何必屠其國有其地安曰臣昔爲澆河戍將與之

相近明其意勢若分軍出其左右拾寅必走保南山不過十日牛馬草盡人無所食眾必潰叛可一舉而定也從之詔陽平王新成建安王穆六頭等出南道南郡公李惠給事中公孫拔及安出北道以討之拾寅走南山諸軍濟河追之時軍多病諸將議賊已遠遁軍容已振今驅疲病之卒要難冀之功不亦過乎眾以爲然乃引還獲駝馬二十餘萬顯祖復詔上黨王長孫觀等率州郡兵討拾寅軍至曼頭山拾寅來逆戰觀等縱兵擊敗之拾寅宵遁於是思悔復脩藩職遣別駕康盤龍奉表朝貢顯祖幽之不報其使拾寅部落大饑屢寇澆河詔平西將軍廣川公皮歡喜率敦煌枹罕高平諸軍爲前鋒司空上黨王長孫觀爲大都督以討之觀等軍入拾寅境芻其秋稼拾寅窘怖遣子詣軍表求改過觀等以聞顯祖以重勞將士乃下詔切責之徵其任子拾寅遣子斤入侍顯祖

尋遣斤還拾寅後復擾掠邊人遣其將良利守洮陽枹罕所統枹罕鎮將西郡公楊鍾葵貽拾寅書以責之拾寅表曰奉詔聽臣還舊土故遣良利守洮陽若不追前恩求令洮陽貢其土物辭旨懇切顯祖許之自是歲脩職貢太和五年拾寅死子度易侯立遣其侍郎時真貢方物復上表稱嗣事後度易侯伐宕昌詔讓之賜錦綵一百二十四匹喻令悛改所掠宕昌口累部送時還易侯並奉詔死子伏連籌立高祖欲令人朝表稱疾病輒脩洮陽泥和城而置戍焉文明太后崩使人告凶伏連籌拜命不恭有司請伐之高祖不許羣臣以其受詔不敬不宜納所獻高祖曰拜受失禮乃可加以告責所獻土毛乃是臣之常道杜棄所獻便是絕之縱欲改悔其路無由矣詔曰朕在哀疚之中未有征討而去春枹罕表取其洮陽泥和二戍時以此旣邊將之常即便聽許及偏師致討二戍

望風請降執訊二千餘人又得婦女九百口子婦可悉還之伏連
籌乃遣世子賀魯頭朝于京師禮錫有加拜伏連籌使持節都督
西垂諸軍事征西將軍領護西戎中郎將西海郡開國公吐谷渾
王麾旗章綬之飾皆備給之後遣兼員外散騎常侍張禮使於伏
連籌伏連籌謂禮曰昔與宕昌通和恆見稱大王已則自名今忽
名僕而拘執此使將命偏師往問其意禮曰君與宕昌並爲魏藩
而比輒有興動殊違臣節當發之日宰輔以爲君若反迷知罪則
克保藩業脫守愚不改則禍難將至伏連籌遂嘿然及高祖崩遣
使赴哀盡其誠敬伏連籌內脩職貢外并戎狄塞表之申號爲疆
富準擬天朝樹置官司稱制諸國以自誇大世宗初詔責之曰梁
州表送卿報宕昌書梁彌邕與卿並爲邊附語其國則隣藩論其
位則同列而稱書爲表名報爲旨有司以國有常刑殷勤請討朕

慮險遠多虞輕相構惑故先宣此意善自三思伏連籌上表自申
辭誠懇至終世宗世至于正光犛牛蜀馬及西南之珍無歲不至
後秦州城人莫折念生反河西路絕涼州城人萬于菩提等東應
念生囚刺史宋穎穎密遣求援於伏連籌伏連籌親率大眾救之
遂獲保全自爾以後關徼不通貢獻路絕伏連籌死子夸呂立始
自號爲可汗居伏侯城在青海西十五里雖有城郭而不居恆處
穹廬隨水草畜牧其地東西三千里南北千餘里官有王公僕射
尙書及郎將將軍之號夸呂椎髻眊珠以皂爲帽坐金師子牀號
其妻爲恪尊衣織成裙披錦大袍辮髮於後首戴金花冠其俗丈
夫衣服略同於華夏多以羅纁爲冠亦以緡爲帽婦人皆貫珠貝
束髮以多爲貴兵器有弓刀甲稍國無常賦須則稅富室商人以
充用焉其刑罰殺人及盜馬者死餘則微物以贖罪亦量事決杖

刑人必以氊蒙頭持石從高擊之父兄死妻後母及嫂等與突厥俗同至于婚貧不能備財者輒盜女去死者亦皆埋殯其服制葬訖則除之性貪婪忍於殺害好射獵以肉酪爲糧亦知種田有大麥粟豆然其北界氣候多寒唯得蕪菁大麥故其俗貧多富少青海周回千餘里海內有小山每冬冰合後以良牝馬置此山至來春收之馬皆有孕所生得駒號爲龍種必多駿異吐谷渾嘗得波斯草馬放入海因生驄駒能日行千里世傳青海驄者是也土出犛牛馬多鸚鵡饒銅鐵朱砂地兼鄯善且末興和中齊獻武王作相招懷荒遠蠕蠕旣附於國夸呂遣使致敬獻武王喻以大義徵其朝貢夸呂乃遣使人趙吐骨真假道蠕蠕頻來又薦其從妹靜帝納以爲嬪遣員外散騎常侍傅靈榭使於其國夸呂又請婚乃以濟南王匡孫女爲廣樂公主以妻之此後朝貢不絕

吐谷渾北有乙佛勿敵國俗風與吐谷渾同不識五穀唯食魚及蘇子蘇子狀若中國枸杞子

北又有阿蘭國與鳥獸同不知鬪戰忽見異人舉國便走土無所出大養羣畜體輕工走逐之不可得

北又有女王國以女爲主人所不至其傳云然

宕昌羌者其先蓋三苗之胤周時與庸蜀微盧等八國從武王滅商漢有先零燒當等世爲邊患其地東接中華西通西域南北數千里姓別自爲部落酋帥皆有地分不相統攝宕昌卽其一也俗皆土著居有屋宇其屋織犛牛尾及羖羊毛覆之國無法令又無徭賦惟戰伐之時乃相屯聚不然則各事生業不相往來皆衣裘褐收養犛牛羊豕以供其食父子伯叔兄弟死者卽以繼母叔母及嫂弟婦等爲妻俗無文字但候草木榮落記其歲時三年一相

聚殺牛羊以祭天有梁勲者世爲酋帥得羌豪心乃自稱王焉勲
孫彌忽世祖初遣子彌黃奉表求內附世祖嘉之遣使拜彌忽爲
宕昌王賜彌黃爵甘松侯彌忽死孫虎子立其地自仇池以西東
西千里牂水以南南北八百里地多山阜人二萬餘落世脩職貢
頗爲吐谷渾所斷絕虎子死彌治立虎子弟羊子先奔吐谷渾吐
谷渾遣兵送羊子欲奪彌治位彌治遣文度北雍本
作使請救顯祖詔武都
鎮將宇文生救之羊子退走彌治死子彌機立遣其司馬利住奉
表貢方物陽文度之叛圍武都彌機遣其二兄率眾救武都破走
文度高祖時遣使子橋表貢朱砂雌黃白石膽各一百斤自此後
歲以爲常朝貢相繼後高祖遣鴻臚劉歸謁者張察拜彌機征南
大將軍西戎校尉梁益二州牧河南公宕昌王後朝于京師殊無
風禮朝罷高祖顧謂左右曰夷狄之有君不如諸夏之亾也宕昌

王雖爲邊方之主乃不如中國一吏於是改授領護西戎校尉靈州刺史王如故賜以車騎戎馬錦綵等遣還國

高昌者車師前王之故地漢之前部地也東西二千里南北五百里四面多大山或云昔漢武遣兵西討師旅頓弊其中兀困者因住焉地勢高敞人庶昌盛因云高昌亦云其地有漢時高昌壘故以爲國號東去長安四千九百里漢西域長史戊巳校尉並居於此晉以其地爲高昌郡張軌呂光沮渠蒙遜據河西皆置太守以統之去敦煌十三日行國有八城皆有華人地多石磧氣候溫暖厥土良沃穀麥一歲再熟宜蠶多五果又饒漆有草名羊刺其上生蜜而味甚佳引水溉田出赤鹽其味甚美復有白鹽其形如玉高昌人取以爲枕貢之中國多蒲萄酒俗事天神兼信佛法國中羊馬牧在隱僻處以避寇非貴人不知其處北有赤石山七十里

有貪汙山夏有積雪此山北鐵勒界也世祖時有闕爽者自爲高昌太守太延中遣散騎侍郎王恩生等使高昌爲蠕蠕所執真君中爽爲沮渠無諱所襲奪據之無諱死弟安周代立和平元年爲蠕蠕所并蠕蠕以闕伯周爲高昌王其稱王自此始也太和初伯周死子義成立歲餘爲其兄首歸所殺自立爲高昌王五年高車王可至羅殺首歸兄弟以敦煌人張孟明爲王後爲國人所殺立馬儒爲王以鞏顧禮麴嘉爲左右長史二十一年遣司馬王體立奉表朝貢請師迎接求舉國內徙高祖納之遣明威將軍韓安保率騎千餘赴之割伊吾五百里以儒居之至羊棧水儒遣禮嘉率步騎一千五百迎安保去高昌四百里而安保不至禮等還高昌安保亦還伊吾安保遣使韓興安等十二人使高昌儒復遣顧禮將其世子義舒迎安保至白棘城去高昌百六十里而高昌舊人

情戀本土不願東遷相與殺儒而立麴嘉爲王嘉字靈鳳金城榆
中人旣立又臣于蠕蠕那蓋顧禮與義舒隨安保至洛陽及蠕蠕
主伏圖爲高車所殺嘉又臣高車初前部胡人悉爲高車所徙入
於焉耆焉耆又爲嚙噠所破滅國人分散眾不自立請王於嘉嘉
遣第二子爲焉耆王以主之熙平元年嘉遣兄子私署左衛將軍
田地太守孝亮朝京師仍求內徙乞軍迎接於是遣龍驤將軍孟
威發涼州兵三千人迎之至伊吾失期而反於後十餘遣使獻珠
像白黑貂裘名馬鹽枕等款誠備至惟賜優旨卒不重迎三年嘉
遣使朝貢世宗又遣孟威使詔勞之延昌中以嘉爲持節平西將
軍瓜州刺史秦臨縣開國伯私署王如故熙平初遣使朝獻詔曰
卿地隔關山境接荒漠頻請朝援徙國內遷雖來誠可嘉卽於理
未帖何者彼之毗庶是漢魏遺黎自晉氏不綱因難播越成家立

國世積已久惡徙重遷人懷戀舊今若動之恐異同之變爰在肘腋不得便如來表神龜元年冬孝亮復表求援內徙朝廷不許正光元年肅宗遣假員外將軍趙義等使於嘉嘉朝貢不絕又遣使奉表自以邊遐不習典誥求借五經諸史并請國子助教劉燮以爲博士肅宗許之嘉死贈鎮西將軍涼州刺史子堅立於後關中賊亂使命遂絕普泰初堅遣使朝貢除平西將軍瓜州刺史泰臨縣伯王如故又加衛將軍至永熙中特除儀同三司進爲郡公後遂隔絕

鄧至者白水羌也世爲羌豪因地名號自稱鄧至其地自亭街以東平武以西汶嶺以北宕昌以南土風習俗亦與宕昌同其王像舒治遣使內附高祖拜龍驤將軍鄧至王遣貢不絕鄧至之西有赫羊等二十國時遣使朝貢朝廷皆授以雜號將軍子男渠帥之

名

蠻之種類蓋盤瓠之後其來自久習俗叛服前史具之在江淮之間依託險阻部落滋蔓布於數州東連壽春西通上洛北接汝潁往往有焉其於魏氏之時不甚爲患至晉之末稍以繁昌漸爲寇暴矣自劉石亂後諸蠻無所忌憚故其族類漸得北遷陸渾以南滿於山谷宛洛蕭條略爲丘墟矣太祖旣定中山聲教被於河表泰常八年蠻王梅安率渠帥數千朝京師求留質子以表忠款始光中拜安侍子豹爲安遠將軍江州刺史順陽公興光中蠻王文武龍請降詔褒慰之拜南雍州刺史魯陽侯延興中大陽蠻酋桓誕擁沔水以北滋葉以南八萬餘落遣使內屬高祖嘉之拜誕征南將軍東荊州刺史襄陽王聽自選郡縣誕字天生桓玄之子也初玄西奔至枚回州被殺誕時年數歲流竄大陽蠻中遂習其俗

及長多智謀爲羣蠻所歸誕旣內屬治於朗陵太和四年王師南
伐誕請爲前驅乃授使持節南征西道大都督討義陽不果而還
十年移居潁陽十六年依例降王爲公十七年加征南將軍中道
大都督征竟陵遇遷洛師停是時蕭贖征虜將軍直閣將軍蠻酋
田益宗率部曲四千餘戶內屬襄陽酋雷婆思等十一人率戶千
餘內徙求居大和川詔給廩食後開南陽令有河北之地蠻人安
堵不爲寇賊十八年誕入朝賞遇隆厚卒謚曰剛子暉字道進位
龍驤將軍東荊州刺史襲爵景明初太陽蠻酋田育丘等二萬八
千戶內附詔置四郡十八縣暉卒贈冠軍將軍三年魯陽蠻魯北
鷲等聚眾攻逼潁川詔左衛將軍李崇討平之徙萬餘家於河北
諸州及六鎮尋叛南走所在追討比及河殺之皆盡四年東荊州
蠻樊素安反僭帝號正始元年素安弟秀安復反李崇揚大眼悉

討平之二年蕭衍沔東太守田清喜擁七郡三十一縣戶萬九千遣使內附乞師討衍其雍州以東石城以西五百餘里水陸援路請率部曲斷之四年蕭衍永寧太守文雲生六部自漢東遣使歸附永平初東荊州表明太守桓叔興前後招慰大陽蠻歸附者一萬七百日請置郡十六縣五十詔前鎮東府長史酈道元檢行置之叔興卽暉弟也延昌元年拜南荊州刺史居安昌隸於東荊三年蕭衍遣兵討江沔破掠諸蠻百姓擾動蠻自相督率二萬餘人頻請統帥爲聲勢叔興給一統并威儀爲之節度蠻人遂安其年蕭衍雍州刺史蕭藻遣其將蔡令孫等三將寇南荊之西南沿襄沔上下破掠諸蠻蠻酋衍龍驤將軍楚石廉叛衍來請援叔興與石廉督集蠻夏二萬餘人擊走之斬令孫等三將藻又遣其新陽太守邵道林於沔水之南石城東北立清水戍爲抄掠之基叔興

遣諸蠻擊破之四年叔興上表請不隸東荆許之蕭衍每有寇抄叔興必摧破之正光中叔興擁所部南叛蠻首成龍強率戶數千內附拜爲刺史蠻帥田午生率戶二千內徙楊州拜爲郡守蕭衍義州刺史邊城王文僧明鐵騎將軍邊城太守田官德等率戶萬餘舉州內屬拜僧明平南將軍西豫州刺史封開封侯官德龍驤將軍義州刺史自餘封授各有差僧明官德並入朝蠻出山至邊城建安者八九千戶義州尋爲蕭衍將裴邃所陷衍定州刺史田超秀亦遣使求附請援歷年朝廷恐輕致邊役未之許會超秀死其部曲相率內附徙之六鎮秦隴所在反叛二荆西郢蠻大擾動斷三鴟路殺都督寇盜至於襄城汝水百姓多被其害蕭衍遣將圍廣陵樊城諸蠻並爲前驅自汝水以南處處鈔劫盜其暴掠連年攻討散而復合其暴滋甚又有冉氏向氏者陬落尤盛餘則大

者萬家小者千戶更相崇僭稱王侯屯據二峽斷邊水路荆蜀行人至有假道者

獠者蓋南蠻之別種自漢中達于邛笮川洞之間所在皆有種類甚多散居山谷略無氏族之別又無名字所生男女唯以長幼次第呼之其丈夫稱阿暮阿段婦人阿夷阿等之類皆語之次第稱謂也依樹積木以居其上名曰干蘭干蘭大小隨其家口之數往往推一長者爲王亦不能遠相統攝父死則子繼若中國之貴族也獠王各有鼓角一雙使其子弟自吹擊之好相殺害多不敢遠能能臥水底持刀刺魚其口嚼食並鼻飲死者豎棺而埋之性同禽獸至於忿怒父子不相避惟手有兵刃者先殺之若殺其父走避求得一狗以謝其母母得狗謝不復嫌恨若報怨相攻擊必殺而食之平常劫掠賣取猪狗而已親戚比隣指授相賣被賣者號

哭不服逃竄避之乃將買人捕逐指若凶叛獲便縛之但經被縛者卽服爲賤隸不敢稱良矣凶失兒女一哭便止不復追思惟執楯持矛不識弓矢用竹爲簧羣聚鼓之以爲音節能爲細布色至鮮淨大狗一頭買一生口其俗畏鬼神尤尚淫祀所殺之人美鬢髯者必剝其面皮籠之於竹及燥號之曰鬼鼓舞祀之以求福利至有賣其昆季妻奴盡者乃自賣以供祭焉鑄銅爲器大口寬腹名曰銅鑿旣薄且輕易於熟食建國中李勢在蜀諸獠始出巴西渠川廣漢陽安資中攻破郡縣爲益州大患勢內外受敵所以凶出自桓溫破蜀之後力不能制又蜀人東流山險之地多空獠遂挾山傍谷與夏人參居者頗輸租賦在深山者仍不爲編戶請衍梁益二州歲歲伐獠以自裨潤公私頗藉爲利正始中夏侯道遷舉漢中內附世宗遣尙書邢巒爲梁益二州刺史以鎮之近夏人

者安堵樂業在山谷者不敢爲寇後以羊祉爲梁州傅豎眼爲益
州祉性酷虐不得物情蕭衍輔國將軍范季旭與獠王趙清荆率
眾屯孝子谷祉遣統軍魏胡擊走之後蕭衍寧朔將軍姜白復擁
夷獠入屯南城梁州人王法慶與之通謀眾屯於固門川祉遣征
虜將軍關二討破之豎眼施恩布信大得獠和後以元法僧代傅
豎眼爲益州法僧在任貪殘獠遂反叛勾引蕭衍軍圍逼晉壽朝
廷憂之以豎眼先得物情復令乘傳往撫獠聞豎眼至莫不欣然
拜迎道路於是而定及元恆元子真相繼爲梁州並無德績諸獠
苦之其後朝廷以梁益二州控攝險遠乃立巴州以統諸獠後以
巴酋嚴始於爲刺史又立隆城鎮所綰獠二十萬戶彼謂北獠歲
輸租布又與外人交通貿易巴州生獠並皆不順其諸頭王每於
時節謁見刺史而已孝昌初諸獠以始欣貪暴相率反叛攻圍巴

州山南行臺勳諭卽時散罷自是獠諸頭王相率詣行臺者相繼
子建厚勞賚之始欣見中國多事又失彼心慮獲罪譴時蕭衍南
梁州刺史陰子春扇惑邊陲始欣謀將南叛始欣族子愷時爲隆
城鎮將密知之嚴設邏候遂禽蕭衍使人并封始欣詔書鐵券刀
劔衣冠之屬表送行臺子建乃啟以鎮爲南梁州愷爲刺史發使
執始欣囚於南鄭遇子建見代梁州刺史傅豎眼仍爲行臺豎眼
久病其子敬紹納始欣重賂使得還州始欣乃起眾攻愷屠滅之
據城南叛蕭衍將蕭玩率眾援接時梁益二州並遣將討之攻陷
巴州執始欣遂大破玩軍及斬玩以傅曇表爲刺史後元羅在梁
州爲使陷自此遂絕

史臣曰氏羌蠻獠風俗各異嗜欲不同言語不通聖人因時設教
所以達其志而通其俗也然而外窻必有內憂覽之者不可不誠

魏書卷一百一 列傳第八十九

魏收書列傳第八十九以史臣論蓋略北史

魏書卷一百二

列傳第九十

西域

夏書稱西戎卽序班固云就而序之非盛威武致其貢物也漢氏初開西域有三十六國其後分立五十五王置校尉都護以撫納之王莽篡位西域遂絕至於後漢班超所通者五十餘國西至西海東西萬里皆來朝貢復置都護校尉以相統攝其後或絕或通漢朝以爲勞弊中國其官時置時廢暨魏晉之後互相吞滅不可復詳記焉太祖初經營中原未暇及於四表旣而西戎之貢不至有司奏依漢氏故事請通西域可以振威德於荒外又可致奇貨於天府太祖曰漢氏不保境安人乃遠開西域使海內虛耗何利之有今若通之前弊復加百姓矣遂不從歷太宗世竟不招納太

延中魏德益以遠聞西域龜茲疏勒烏孫悅般渴槃陀鄯善焉耆
車師粟特諸國王始遣使來獻世祖以西域漢世雖通有求則卑
辭而來無欲則驕慢王命此其自知絕遠大兵不可至故也若報
使往來終無所益欲不遣使有司奏九國不憚遐嶮遠貢方物當
與其進安可豫抑後來乃從之於是始遣行人王恩生許綱等西
使恩生出流沙爲蠕蠕所執竟不果達又遣散騎侍郎董琬高明
等多齎錦帛出鄯善招撫九國厚賜之初琬等受詔便道之國可
往赴之琬過九國北行至烏孫國其王得朝廷所賜拜受甚悅謂
琬曰傳聞破洛那者舌皆思魏德欲稱臣致貢但患其路無由耳
今使君等旣到此可往二國副其慕仰之誠琬於是自向破洛那
遣明使者舌烏孫王爲發導譯達二國琬等宣詔慰賜之已而琬
明東還烏孫破洛那之屬遣使與琬俱來貢獻者十有六國自後

相繼而來不闕于歲國使亦數十輩矣初世祖每遣使西域常詔河西王沮渠牧犍令護送至姑臧牧犍恆發使導路出於流沙後使者自西域還至武威牧犍左右謂使者曰我君承蠕蠕吳提妄說云去歲魏天子自來伐我士馬疫死大敗而還我禽其長弟樂平王丕我君大喜宣言國中又聞吳提遣使告西域諸國稱魏已削弱今天下唯我爲彊若更有魏使勿復奉西域諸國亦有貳者牧犍事主稍以慢惰使還具以狀聞世祖遂議討牧犍涼州旣平鄯善國以爲脣亾齒寒自然之道也今武威爲魏所滅次及我也若通其使人知我國事取亾必近不如絕之可以支久乃斷塞行路西域貢獻歷年不入後平鄯善行人復通始琬等使還京師具言凡所經見及傳聞傍國云西域自漢武時五十餘國後稍相并至太延中爲十六國分其地爲四域自葱嶺以東流沙以西爲

一域葱嶺以西海曲以東爲一域者舌以南月氏以北爲一域兩海之間水澤以南爲一域內諸小渠長蓋以數百其出西域本有二道後更爲四出自玉門渡流沙西行二千里至鄯善爲一道自玉門渡流沙北行二千二百里至車師爲一道從莎車西行二百里至葱嶺葱嶺西一千三百里至伽倍爲一道自莎車西南五百里葱嶺西南一千三百里至波路爲一道焉自琬所不傳而更有朝貢者紀其名不能具國俗也其與前史所異者錄之

鄯善國都扞泥城古樓蘭國也去代七千六百里所都城方一里地多沙鹵少水草北卽白龍堆路至大延初始遣使來獻四年遣其弟素延耆入侍及世祖平涼州沮渠牧犍弟無諱走保敦煌無諱後謀渡流沙遣其弟安周擊鄯善王比龍恐懼欲降會魏使者自天竺屬賓還俱會鄯善勸比龍拒之遂與連戰安周不能尅退

保東城後比龍懼率眾西奔且末其世子乃應安周鄯善人頗剽劫之令不得通世祖詔散騎常侍成周公萬度歸乘傳發涼州兵討之度歸到敦煌留輜重以輕騎五千渡流沙至其境時鄯善人焮布野度歸勅吏卒不得有所侵掠邊守感之皆望旗稽服其王真達面縛出降度歸釋其縛留軍屯守與真達詣京都世祖大悅厚待之是歲拜交趾公韓牧爲假節征西將軍領護西戎校尉鄯善王以鎮之賦役其人比之郡縣

且末國都且末城在鄯善西去代八千三百二十里真君三年鄯善王比龍避沮渠安周之難率國人之半奔且末後役屬鄯善且末西北方流沙數百里夏日有熱風爲行旅之患風之所至唯老駝豫知之卽鳴而聚立理其口鼻於沙中人每以爲候亦卽將氈擁蔽鼻口其風迅駛斯須過盡若不防者必至危斃

于闐國在且末西北葱嶺之北二百餘里東去鄯善千五百里南
去女國二千里去朱俱波千里北去龜茲千四百里去代九千八
百里其地方亘千里連山相次所都城方八九里部內有大城五
小城數十于闐城東三十里有首拔河中出玉石土宜五穀并桑
麻山多美玉有好馬駝騾其刑法殺人者死餘罪各隨輕重懲罰
之自外風俗物產與龜茲略同俗重佛法寺塔僧尼甚眾王尤信
尚每設齋日必親自灑掃饋食焉城南五十里有贊摩寺卽昔羅
漢比丘盧旃爲其王造覆盆浮圖之所石上有辟支佛跣處雙跡
猶存于闐西五里有比摩寺云是老子化胡成佛之所俗無禮義
多盜賊淫縱自高昌以西諸國人等深目高鼻唯此一國貌不甚
胡頗類華夏城東二十里有大水北流號樹枝水卽黃河也一名
計式水城西五十五里亦有大水名達利水與樹枝水會俱北流

真君中世祖詔高涼王那擊吐谷渾慕利延慕利延懼驅其部落
渡流沙那進軍急追之慕利延遂西入于闐殺其王死者甚眾顯
祖末蠕蠕寇于闐于闐患之遣使素日伽上表曰西方諸國今皆
已屬蠕蠕奴世奉大國至今無異今蠕蠕軍馬到城下奴聚兵自
固故遣使奉獻延望救援顯祖詔公卿議之公卿奏曰于闐去京
師幾萬里蠕蠕之性惟習野掠不能攻城若爲所拒當已旋矣雖
欲遣師勢無所及顯祖以公卿議示其使者亦以爲然於是詔之
曰朕承天理物欲令萬方各安其所應勅諸軍以拯汝難但去汝
遐阻雖復遣援不救當時之急已停師不行汝宜知之朕今練甲
養卒一二歲間當躬率猛將爲汝除患汝其謹警候以待大舉先
是朝廷遣使者韓羊皮使波斯波斯王遣使獻馴象及珍物經于
闐于闐中于王秋仁輒留之假言慮有寇不達羊皮言狀顯祖怒

又遣羊皮奉詔責讓之自後每使朝獻

蒲山國故皮山國也居皮城在于闐南去代一萬二千里其國西南三里有凍凌山後役屬于闐

悉居半國故西夜國也一名子合其王號子治呼犍在于闐西去代萬二千九百七十里太延初遣使來獻自後貢使不絕

權於摩國故烏秣國也其王居烏秣城在悉居半西南去代一萬二千九百七十里

渠莎國居故莎車城在子合西北去代一萬二千九百八十里

車師國一名前部其王居交河城去代萬五十里其地北接蠕蠕

本通使交易世祖初始遣使朝獻詔行人王恩生許綱等出使恩

生等始度流沙爲蠕蠕所執恩生見蠕蠕吳提持魏節不爲之屈

後世祖切讓吳提吳提懼乃遣恩生等歸許綱到敦煌病死朝廷

壯其節賜諡曰貞初沮渠無諱兄弟之渡流沙也鳩集遺人破軍師國真君十一年車師王車夷落遣使琛進薛直上書曰臣父僻處塞外仰慕天子威德遣使表獻不空於歲天子降念賜遺甚厚及臣繼立亦不闕常貢天子垂矜亦不異前世敢緣至恩輒陳私難臣國自無諱所攻擊經今八歲人民饑荒無以存活賊今攻臣甚急臣不能自全遂捨國東奔三分免一卽日已到焉耆東界思歸天闕幸垂賑救於是下詔撫慰之開焉耆倉給之正平初遣子入侍自後每使朝貢

且彌國都天山東于大谷在車師北去代一萬五百七十里本役屬車師

焉耆國在車師南都員渠城白山南七十里漢時舊國也去代一萬二百里其王姓龍名鳩尸卑那卽前涼張軌所討龍熙之胤所

都城方二里國內凡有九城國小人貧無綱紀法令兵有弓刀甲
稍婚姻略同華夏死亾者皆焚而後葬其服制滿七日則除之丈
夫並翦髮以爲首飾文字與婆羅門同俗事天神並崇信佛法尤
重二月八日四月八日是日也其國咸依釋教齋戒行道焉氣候
寒土田良沃穀有稻粟菽麥畜有駝馬養蠶不以爲絲唯充綿纈
俗尙葡萄酒兼愛音樂南去海十餘里有魚鹽蒲葦之饒東去高
昌九百里西去龜茲九百里皆沙磧東南去瓜州二千二百里恃
地多險頗剽劫中國使世祖怒之詔成周公萬度歸討之約齋輕
糧取食路次度歸入焉耆東界擊其邊守左回尉犁二城拔之進
軍向員渠鳩尸卑那以四五萬人出城守險以拒度歸募壯勇短
兵直往衝尸鳩卑那眾大潰盡虜之單騎走入山中度歸進屠其
城四鄙諸戎皆降服焉耆爲國斗絕一隅不亂日久獲其珍奇異

翫殊方譎詭不識之物橐駝馬牛雜畜巨萬時世祖幸陰山北宮
度歸破焉耆露板至世祖省訖賜司徒崔浩書曰萬度歸以五千
騎經萬餘里拔焉耆三城獲其珍奇異物及諸委積不可勝數自
古帝王雖云卽序西戎有如指注不能控引也朕今手把而有之
如何浩上書稱美遂命度歸鎮撫其人初鳩尸卑那走山中猶覬
城不拔得還其國既見盡爲度歸所剋乃奔龜茲茲以其壻厚
待之

龜茲國在尉犁西北白山之南一百七十里都延城漢時舊國也
去代一萬二千八十里其王姓白卽後涼呂光所立白震之後其
王頭繫綵帶垂之於後坐金師子牀所居城方五六里其刑法殺
人者死劫賊則斷其一臂并別一足稅賦準地徵租無田者則稅
銀錢風俗婚姻喪葬物產與焉耆略同唯氣候少溫爲異又出細

氈饒銅鐵鉛麀皮氈餼沙鹽綠雌黃胡粉安息香良馬犂牛等東
有輪臺卽漢貳師將軍李廣利所屠者其南三百里有大河東流
號計式水卽黃河也東去焉耆九百里南去于闐一千四百里西
去疏勒一千五百里北去突厥牙帳六百餘里東南去瓜州三百
里其東闕城戍寇竊非一世祖詔萬度歸率騎一千以擊之龜茲
遣烏羯目提等領兵三千距戰度歸擊走之斬二百餘級大獲駝
馬而還俗性多淫置女市收男子錢入官土多孔雀羣飛山谷間
人取養而食之葶乳如鷄鶩其王家恆有千餘隻云其國西北大
山中有如膏者流出成川行數里入地如飴餠甚臭服之髮齒已
落者能令更生病人服之皆愈自後每使朝貢

姑默國居南城在龜茲西去代一萬五百里役屬龜茲

溫宿國居溫宿城在姑默西北去代一萬五百五十里役屬龜茲

尉頭國居尉頭城在溫宿北去代一萬六百五十里役屬龜茲

烏孫國居赤谷城在龜茲西北去代一萬八百里其國數爲蠕蠕所侵西徙葱嶺山中無城郭隨畜牧逐水草太延三年遣使者董琬等使其國後每使朝貢

疏勒國在姑默西白山南百餘里漢時舊國也去代一萬一千二百五十里高宗末其王遣使送釋迦牟尼佛袈裟一長二丈餘高宗以審是佛衣應有靈異遂燒之以驗虛實置於猛火之上經日不然觀者莫不悚駭心形俱肅其王戴金師子冠土多稻粟麻麥銅鐵錫雌黃錦綿每歲常供送於突厥其都城方五里國內有大城十二小城數十人手足皆六指產子非六指者卽不育勝兵二千人南有黃河西帶葱嶺東去龜茲千五百里西去鑿汗國千里南去朱俱波八九百里東北至突厥牙帳千餘里東南去瓜州四

千六百里

悅般國在烏孫西北去代一萬九百三十里其先匈奴北單于之部落也爲漢車騎將軍竇憲所逐北單于度金微山西走康居其羸弱不能去者住龜茲北地方數千里眾可二十餘萬涼州人猶謂之單于王其風俗言語與高車同而其人清潔於胡俗翦髮齊眉以醜黼塗之昱昱然光澤曰三澡漱然後飲食其國南界有火山山傍石皆焦鎔流地數十里乃凝堅人取爲藥卽石流黃也與蠕蠕結好其王嘗將數千人入蠕蠕國欲與大檀相見入其界百餘里見其部人不浣衣不絆髮不洗手婦人舌舐器物王謂其從臣曰汝曹誑我入此狗國中乃馳還大檀遣騎追之不及自是相仇讎數相征討眞君九年遣使朝獻并送幻人稱能割人喉脉令斷擊人頭令骨陷皆血出或數升或盈斗以草藥內其口中令嚼

咽之須臾血止養瘡一月復常又無痕癥世祖疑其虛乃取死罪囚試之皆驗云中國諸名山皆有此草乃使人受其術而厚遇之又言其國有大術者蠕蠕來抄掠術人能作霖雨狂風大雪及行潦蠕蠕凍死漂亾者十二三是歲再遣使朝貢求與官軍東西齊契討蠕蠕世祖嘉其意命中外諸軍戒嚴以淮南王他爲前鋒襲蠕蠕仍詔有司以其鼓舞之節施於樂府自後每使貢獻

者至拔國都者至拔城在疏勒西去代一萬一千六百二十里其國東有潘賀那山出美鐵及師子

迷密國都迷密城在者至拔西去代一萬二千六百里正平元年遣使獻一峯黑橐駝其國東有山名郁悉滿山出金玉亦多鐵

悉萬斤國都悉萬斤城在迷密西去代一萬二千七百二十里其國南有山名伽色那山出師子每使朝貢

忸密國都忸密城在悉萬斤西去代二萬二千八百二十八里
洛那國故大宛國也都貴山城在疏勒西北去代萬四千四百五
十里太和三年遣使獻汗血馬自此每使朝貢

粟特國在葱嶺之西古之奄蔡一名溫那沙居於大澤在康居西
北去代一萬六千里先是匈奴殺其王而有其國至王忽倪已三
世矣其國商人先多詣涼土販貨及克姑臧悉見虜高宗初粟特
王遣使請贖之詔聽焉自後每使朝獻

波斯國都宿利城在忸密西古條支國也去代二萬四千二百二
十八里城方十里戶十餘萬河經其城中南流土地平正出金銀
鍮石珊瑚琥珀車渠馬腦多大真珠頗黎瑠璃水精瑟瑟金剛火
齊鑛鐵銅錫朱砂水銀綾錦疊毼毼毼赤麀皮及薰陸鬱金
蘇合青木等香胡椒萆撥石蜜千年棗香附子訶梨勒無食子鹽

綠雌黃等物氣候暑熱家自藏冰地多沙磧引水溉灌其五穀及鳥獸等與中夏略同唯無稻及黍稷土出名馬大驢及駝往往有日行七百里者富室至有數千頭又出白象師子大鳥卵有鳥形如囊駝有兩翼飛而不能高食草與肉亦能噉火其王姓波氏名斯坐金羊牀戴金花冠衣錦袍織成帔飾以真珠寶物其俗丈夫剪髮戴白皮帽貫頭衫兩廂近下開之亦有巾帔緣以織成婦女服大衫披大帔其髮前爲髻後披之飾以金銀花仍貫五色珠落之於膊王於其國內別有小牙十餘所猶中國之離宮也每年四月出遊處之十月乃還王卽位以後擇諸子內賢者密書其名封之於庫諸子及大臣皆莫之知也王死眾乃發書視之其封內有名者卽立以爲王餘子出各就邊任兄弟更不相見也國人號王曰醫噴妃曰防步率王之諸子曰殺野大官有摸胡壇掌國內獄

訟泥忽汗掌庫藏開禁他早掌文書及眾務次有遏羅訶地掌王之內事薛波勃掌四方兵馬其下皆有屬官分統其事兵有甲稍圓排劔弩弓箭戰兼乘象百人隨之其刑法重罪懸諸竿上射殺之次則繫獄新王立乃釋之輕罪則劓刑若髡或翦半鬢及繫牌於項以爲耻辱犯彊盜者繫之終身姦貴人妻者男子流婦人割其耳鼻賦稅則準地輸銀錢俗事火神天神文字與胡書異多以姊妹爲妻妾自餘婚合亦不擇尊卑諸夷之中最爲醜穢矣百姓女年十歲以上有姿貌者王收養之有功勳人卽以分賜死者多棄屍於山一月著服城外有人別居唯知喪葬之事號爲不淨人若入城市搖鈴自別以六月爲歲首尤重七月七日十二月一日其日人庶以上各相命召設會作樂以極懽娛又每年正月二十日各祭其先死者神龜中其國遣使上書貢物云大國天子天之

所生願曰出處常爲漢中天子波斯國王居和多千萬敬拜朝廷
嘉納之自此每使朝獻

伏盧尼國都伏盧尼城在波斯國北去代二萬七千三百二十里
累石爲城東有大河南流中有鳥其形似人亦有如橐駝馬者皆
有翼常居水中出水便死城北有云尼山出銀珊瑚琥珀多師子
色知顯國都色知顯城在悉萬斤西北去代一萬二千九百四十
里土平多五果

伽色尼國都伽色尼城在悉萬斤南去代一萬二千九百里出赤
鹽多五果

薄知國都薄知城在伽色尼南去代一萬三千三百二十里多五
果

牟知國都牟知城在忸密西南去代二萬二千九百二十里土平

禽獸草木類中國

阿弗太汗國都阿弗太汗城在忸密西去代二萬三千七百二十里土平多五果

呼似密國都呼似密城在阿弗太汗西去代二萬四千七百里土平出銀琥珀有師子多五果

諾色波羅國都波羅城在忸密南去代二萬三千四百二十八里土平宜稻麥多五果

早伽至國都早伽至城在忸密西去代二萬三千七百二十八里土平少田植取稻麥於隣國有五果

伽不單國都伽不單城在悉萬斤西北去代一萬二千七百八十里土平宜稻麥有五果

者舌國故康居國在破洛那西北去代一萬五千四百五十里太

延三年遣使朝貢自是不絕

伽倍國故休密翁侯都和墨城在莎車西去代一萬三千里人居山谷間

折薛莫孫國故雙靡翁侯都雙靡城在伽倍西去代一萬三千五百里人居山谷間

鉗敦國故貴霜翁侯都護澡城在折薛莫孫西去代一萬三千五百六十里人居山谷間

弗敵沙國故肸頓翁侯都薄茅城在鉗敦西去代一萬三千六百六十里居山谷間

閻浮謁國故高附翁侯都高附城在弗敵沙南去代一萬三千七百六十里居山谷間

大月氏國都盧監氏城在弗敵沙西去代一萬四千五百里北與

蠕蠕接數爲所侵遂西徙都薄羅城去弗敵沙二千一百里其王寄多羅勇武遂興師越大山南侵北天竺自乾陁羅以北五國盡役屬之世祖時其國人商販京師自云能鑄石爲五色瑠璃於是採礦山中於京師鑄之既成光澤乃美於西方來者乃詔爲行殿容百餘人光色映徹觀者見之莫不驚駭以爲神明所作自此中國瑠璃遂賤人不復珍之

安息國在葱嶺西都蔚搜城北與康居西與波斯相接在大月氏西北去代二萬一千五百里

大秦國一名黎軒都安都城從條支西渡海曲一萬里去代三萬九千四百里其海傍出猶渤海也而東西與渤海相望蓋自然之理地方六千里居兩海之間其地平正人居星布其王都城分爲五城各方五里周六十里王居中城城置八臣以主四方而王城

亦置八臣分主四城若謀國事及四方有不決者則四城之臣集
議王所王自聽之然後施行王三年一出觀風化人有冤枉詣王
訴訟者當方之臣小則讓責大則黜退令其舉賢人以代之其人
端正長大衣服車旗擬儀中國故外域謂之大秦其土宜五穀桑
麻人務蠶田多瓊琳琅玕神龜白馬朱鬣明珠夜光璧東南通交
趾又水道通益州永昌郡多出異物大秦西海水之西有河河西
南流河西有南北山山西有赤水西有白玉山山西有西王母
山玉爲堂云從安息西界循海曲亦至大秦四萬餘里於彼國觀
日月星辰無異中國而前史云條支西行百里日入處失之遠矣
阿鈎羌國在莎車西南去代一萬三千里國西有懸度山其間四
百里中往往有棧道下臨不測之淵人行以繩索相持而度因以
名之土有五穀諸果市用錢爲貨居止立宮室有兵器土出金珠

波路國在阿鈎羌西北去代一萬三千九百里其地濕熱有蜀馬土平物產國俗與阿鈎羌同

小月氏國都富樓沙城其王本大月氏王寄多羅子也寄多羅爲匈奴所逐西徙後令其子守此城因號小月氏焉在波路西南去代一萬六千六百里先居西平張掖之間被服頗與羌同其俗以金銀錢爲貨隨畜牧移徙亦類匈奴其城東十里有佛塔周三百五十步高八十丈自佛塔初建計至武定八年八百四十二年所謂百丈佛圖也

罽賓國都善見城在波路西南去代一萬四千二百里居在四山中其地東西八百里南北三百里地平溫和有苜蓿雜草奇木檀槐梓竹種五穀糞園田地下濕生稻冬食生菜其人工巧雕文刻鏤織罽有金銀銅錫以爲器物市用錢他畜與諸國同每使朝獻

吐呼羅國去代一萬二千里東至范陽國西至悉萬斤國中問相
去二千里南至連山不知名北至波斯國中問相去一萬里國中
有薄提城周市六十里城南有西流大水名漢樓河土宜五穀有
好馬駝騾其王曾遣使朝貢

副貨國去代一萬七千里東至阿副使且國西至沒誰國中問相
去一千里南有連山不知名北至奇沙國相去一千五百里國中
有副貨城周市七十里宜五穀萄桃唯有馬駝騾國王有黃金殿
殿下金駝七頭各高三尺其王遣使朝貢

南天竺國去代三萬一千五百里有伏醜城周市十里城中出摩
尼珠珊瑚城東三百里有拔賴城城中出黃金白真檀石蜜蒲萄
土宜五穀世宗時其國王婆羅化遣使獻駿馬金銀自此每使朝
貢

疊伏羅國去代三萬一千里國中有勿悉城城北有鹽奇水西流有白象并有阿末黎木皮中織作布土宜五穀世宗時其國王伏陁末多遣使獻方物自是每使朝貢

拔豆國去代五萬一千里東至多勿當國西至旃那國中閒相去七百五十里南至罽陵伽國北至弗那伏且國中閒相去九百里國中出金銀雜寶白象水牛犛牛蒲萄五果土宜五穀

嚙嚙國大月氏之種類也亦曰高車之別種其原出於塞北自金山而南在于闐之西都馬許水南二百餘里去長安一萬二百里其王都拔底延城蓋王舍城也其城方十里餘多寺塔皆飾以金風俗與突厥略同其俗兄弟共一妻夫無兄弟者其妻戴一角帽若有兄弟者依其多少之數更加角焉衣服類加以纓絡頭皆翦髮其語與蠕蠕高車及諸胡不同眾可十萬無城邑依隨水草以

氈爲屋夏遷涼土冬逐煖處分其諸妻各在別所相去或二百三
百里其王巡歷而行每月一處冬寒之時三月不徙王位不必傳
子子弟堪任死便授之其國無車有輿多駝馬用刑嚴急偷盜無
多少皆戮斬盜一貴十死者富者累石爲藏貧者掘地而埋隨身
諸物皆置冢內其人凶悍能鬪戰西域康居于闐沙勒安息及諸
小國三十許皆役屬之號爲大國與蠕蠕婚姻自太安以後每遣
使朝貢正光末遣使貢師子一至高平遇万俟醜奴反因留之醜
奴平送京師永熙以後朝獻遂絕初熙平中肅宗遣王伏子統宋
雲沙門法力等使西域訪求佛經時有沙門慧生者亦與俱行正
光中還慧生所經諸國不能知其本末及山川里數蓋舉其略云
其國去漕國千五百里去瓜州六千五百里

朱居國在于闐西其人山居有麥多林果咸事佛語與于闐相類

役屬嘍噠

渴槃陁國在葱嶺東朱駒波西河經其國東北流有高山夏積霜雪亦事佛道附於嘍噠

鉢和國在渴槃陁西其土尤寒人畜同居穴地而處又有大雪山望若銀峯其人唯食餅麩飲麥酒服氊裘有二道一道西行向嘍噠一道西南趣烏莫亦爲嘍噠所統

波知國在鉢和西南土狹人貧依託山谷其王不能總攝有三池傳云大池有龍王次者有龍婦小者有龍子行人經之設祭乃得過不祭多遇風雪之困

賒彌國在波知之南山居不信佛法專事諸神亦附嘍噠東有鉢盧勒國路嶮緣鐵鎖而度下不見底熙平中宋雲等竟不能達

烏婁國在賒彌南北有葱嶺南至天竺婆羅門胡爲其上族婆羅

門多解天文吉凶之數其王動則訪決焉土多林果引水灌田豐
稻麥事佛多諸寺塔事極華麗人有爭訴服之以藥曲者發狂直
者無恙爲法不殺犯死罪唯徙於靈山西南有檀特山山上立寺
以驢數頭運食山下無人控御自知往來也

乾陁國在烏菴西本名業波爲噉所破因改焉其王本是勅勒
臨國民二世矣好征戰與罽賓鬪三年不罷人怨苦之有鬪象七
百頭十人乘一象皆執兵仗象鼻縛刀以戰所都城東南七里有

佛塔高七十丈周三百步卽所謂雀離佛圖

宋本作國

康國者康居之後也遷徙無常不恆故地自漢以來相承不絕其
王本姓溫月氏人也舊居祁連山北昭武城因被匈奴所破西踰
葱嶺遂有其國枝庶各分王故康國左右諸國並以昭武爲姓示
不忘本也王字世夫畢爲人寬厚甚得眾心其妻突厥達度可汗

女也都於薩寶水上阿祿迪城多人居大臣三人共掌國事其王
索髮冠七寶金花衣綾羅錦繡白疊其妻有髻幪以毛巾丈夫翦
髮錦袍名爲疆國西域諸國多歸之米國史國曹國何國安國小
安國那色波國烏那曷國穆國皆歸附之有胡律置於祆祠將決
罰則取而斷之重者族次罪者死賊盜截其足人皆深目高鼻多
髯善商賈諸夷交易多湊其國有大小鼓琵琶五弦箜篌婚姻喪
制與突厥同國立祖廟以六月祭之諸國皆助祭奉佛爲胡書氣
候溫宜五穀勤脩園蔬樹木滋茂出馬駝驢犂牛黃金硃沙賄香
阿薛那香瑟瑟麀皮氍毹錦疊多蒲萄酒富家或致千石連年不
敗太延中始遣使貢方物後遂絕焉

史臣曰西域雖通魏氏而中原始平天子方以混一爲心未遑征
伐其信使往來深得羈縻勿絕之道耳

及古明

魏書卷一百二 列傳第九十

魏收書西域傳此卷全寫北史西域傳而不錄安國以後案
隋書西域傳云康國大業中始遣使貢方物後遂絕焉此改大業字爲太延蓋後人妄改

魏書卷一百三

列傳第九十一

蠕蠕

匈奴字文莫槐

徒何段就六眷

高車

蠕蠕東胡之苗裔也姓郁久閭氏始神元之末掠騎有得一奴髮始齊眉忘本姓名其主字之曰木骨閭木骨閭者首禿也木骨閭與郁久閭聲相近故後子孫因以爲氏木骨閭旣壯免奴爲騎卒穆帝時坐後期當斬亾匿廣漠谿谷間收合逋逃得百餘人依純突隣部木骨閭死子車鹿會雄健始有部眾自號柔然而役屬於國後世祖以其無知狀類於蠶故改其號爲蠕蠕車鹿會旣爲部

帥歲貢馬畜貂獬皮冬則徙度漠南夏則還居漠北車鹿會死子吐奴傀立吐奴傀死子跋提立跋提死子地粟袁立地粟袁死其部分爲二地粟袁長子匹候跋繼父居東邊次子縕紇提別居西邊及昭成崩縕紇提附衛辰而貳於我登國中討之蠕蠕移部遁走追之及於大磧南牀山下大破之虜其半部匹候跋及部帥屋擊各收餘落遁走遣長孫嵩及長孫肥追之渡磧嵩至平望川大破屋擊禽之斬以徇肥至涿邪山及匹候跋跋舉落請降獲縕紇提子曷多汗及曷多汗兄詰歸之社論斛律等并宗黨數百人分配諸部縕紇提西遁將歸衛辰太祖追之至跋那山縕紇提復降太祖撫慰如舊九年曷多汗與社論率部眾棄其父西走長孫肥輕騎追之至上郡跋那山斬曷多汗盡殪其眾社論與數百人奔匹候跋匹候跋處之南鄙去其庭五百里令其子四人監之旣而

社崙率其私屬執匹候跋四子而叛襲匹候跋諸子收餘眾依
高車斛律部社崙兇狡有權變月餘乃釋匹候跋歸其諸子欲聚
而殲之密舉兵襲匹候跋殺匹候跋子啟拔吳頡等十五人歸于
太祖社崙既殺匹候跋懼王師討之乃掠五原以西諸部北度大
漠太祖以拔頡爲安遠將軍平棘侯社崙與姚興和親太祖遣材
官將軍和突襲黜弗素古延諸部社崙遣騎救素古延突逆擊破
之社崙遠遁漠北侵高車深入其地遂并諸部凶勢益振北徙弱
洛水始立軍法千人爲軍軍置將一人百人爲幢幢置帥一人先
登者賜以虜獲退懦者以石擊首殺之或臨時捶撻無文記將帥
以羊屎粗計兵數後頗知刻木爲記其西北有匈奴餘種國尤富
彊部帥曰拔也稽舉兵擊社崙社崙逆戰於頭根河立破之後盡
爲社崙所并號爲彊盛隨水草畜牧其西則焉耆之地東則朝鮮

之地北則渡沙漠窮瀚海南則臨大磧其常所會庭則敦煌張掖
之北小國皆苦其寇抄羈縻附之於是自號亾豆伐可汗亾豆伐
猶魏言駕馭開張也可汗猶魏言皇帝也蠕蠕之俗君及大臣因
其行能卽爲稱號若中國立諡旣死之後不復追稱太祖謂尙書
崔玄伯曰蠕蠕之人昔來號爲頑嚚每來抄掠駕犝牛奔遁驅犝
牛隨之犝牛伏不能前異部人有教其以犝牛易之者蠕蠕曰其
母尙不能行而况其子終於不易遂爲敵所虜今社論學中國之
法置戰陳卒成邊害道家言聖人生大盜起信矣天興五年社論
聞太祖征姚興遂犯塞入參合陂南至豺山及善無北澤時遣常
山王遵以萬騎追之不及天賜中社論從弟悅代大那等謀殺社
論而立大那發覺大那等來奔以大那爲冠軍將軍西平侯悅代
爲越騎校尉易陽子三年夏社論寇邊永興元年冬又犯塞二年

太宗討之社崙遁走道死其子度拔年少未能御眾部落立社崙弟斛律號藹苦蓋可汗魏言姿質美好也斛律北并賀術也骨國東破譬曆辰部落三年斛律宗人悅侯咄觚干等數百人來降斛律畏威自守不敢南侵北邊安靜神瑞元年與馮跋和親跋聘斛律女爲妻將爲交婚斛律長兄子步鹿真謂斛律曰女小遠適憂思生疾可遣大臣樹黎勿地延等女爲媵斛律不許步鹿真出謂樹黎等曰斛律欲令汝女爲媵遠至他國黎遂其結謀令勇士夜就斛律穹廬候其出執之與女俱嬪于和龍乃立步鹿真步鹿真立委政樹黎初高車叱洛侯者叛其渠帥導社崙破諸部落社崙德之以爲大人步鹿真與社崙子社拔其至叱洛侯家媵其少妻少妻告步鹿真叱洛侯欲舉大檀爲主遣大檀金馬勒爲信步鹿真聞之歸發八千騎往圍叱洛侯叱洛侯焚其珍寶自刎而死步

鹿真遂掩大檀大檀發軍執步鹿真及社拔絞殺之乃自立大檀者社崙季父僕渾之子先統別部鎮於西界能得眾心國人推戴之號牟汗紇升蓋可汗魏言命勝也斛律父子既至和龍馮跋封爲上谷侯大檀率眾南徙犯塞太宗親討之大檀懼而遁走遣山陽侯奚斤等追之遇寒雪士眾凍死墮指者十二三及太宗崩世祖卽位大檀聞而大喜始光元年秋乃寇雲中世祖親討之三日二夜至雲中大檀騎圍世祖五十餘重騎逼馬首相次如堵馬士卒大懼世祖顏色自若眾情乃安先是檀弟大那與社崙爭國敗而來奔大檀以大那子於陟斤爲部帥軍士射於陟斤殺之大檀恐乃還二年世祖大舉征之東西五道並進平陽王長孫翰等從黑漠汝陰公長孫道生從白黑兩漠閒車駕從中道東平公娥清次西從栗園宜城王奚斤將軍安原等西道從介寒山諸軍至

漠南舍輜重輕騎齎十五日糧絕漠討之大檀部落駭驚北走神
麤元年八月大檀遣子將騎萬餘人入塞殺掠邊人而走附國高
車追擊破之自廣盛還追之不及二年四月世祖練兵于南郊將
襲大檀公卿大臣皆不願行術士張淵徐辯以天文說止世祖世
祖從崔浩計而行會江南使還稱劉義隆欲犯河南謂行人曰汝
疾還告魏主歸我河南地卽當罷兵不然盡我將士之力世祖聞
而大笑告公卿曰龜鼈小豎自救不暇何能爲也就使能來若不
先滅蠕蠕便是坐待寇至腹背受敵非上策也吾行決矣於是車
駕出東道向黑山平陽王長孫翰從西道向大娥山同會賊庭五
月次于沙漠南舍輜重輕襲之至粟水大檀眾西奔弟匹黎先典
東落將赴大檀遇翰軍翰縱騎擊之殺其大人數百大檀聞之震
怖將其族黨焚燒廬舍絕跡西走莫知所至於是國落四散竄伏

山谷畜產布野無人收視世祖緣粟水西行過漢將寶憲故壘六月車駕次於兔園水去平城三千七百里分軍搜討東至瀚海西接張掖水北渡燕然山東西五千餘里南北三千里高車諸部殺大檀種類前後歸降三十餘萬俘獲首虜及戎馬百餘萬匹八月世祖聞東部高車屯已尼陂人畜甚眾去官軍千餘里遂遣左僕射安原等往討之暨已尼陂高車諸部望軍降者數十萬大檀部落衰弱因發疾而死子吳提立號勅連可汗魏言神聖也四年遣使朝獻先是北鄙候騎獲吳提南徧邏者二十餘人世祖賜之衣服遣歸吳提上下感德故朝貢焉世祖厚賓其使而遣之延和三年二月以吳提尙西海公主又遣使人納吳提妹爲夫人又進爲左昭儀吳提遣其兄禿鹿傀及左右數百人來朝獻馬二千匹世祖大悅班賜甚厚至太延二年乃絕和犯塞四年車駕幸五原遂

征之樂平王丕河東公賀多羅督十五將出東道永昌王健宜都
王穆壽督十五將出西道車駕出中道至浚稽山分中道復爲二
道陳留王崇從大澤向涿邢山車駕從浚稽北向天山西登白阜
刻石記行不見蠕蠕而還時漠北大旱無水草軍馬多死五年車
駕西伐沮渠牧犍宜都王穆壽輔景穆居守長樂王嵇敬建寧王
崇二萬人鎮漠南以備蠕蠕吳提果犯塞壽素不設備賊至七介
山京邑大駭爭奔中城司空長孫道生拒之於吐頽山吳提之寇
也留其兄乞列歸與北鎮諸軍相守敬崇等破乞列歸於陰山之
北獲之乞列歸歎曰沮渠陷我也獲其伯父他吾無鹿胡及其將
帥五百人斬首萬餘級吳提聞而遁走道生追之至于漠南而還
眞君四年車駕幸漠南分四道樂安王範建寧王崇各統十五將
出東道樂平王督十五將出西道車駕出中道中山王辰領十五

將爲中軍後繼車駕至鹿渾谷與賊相遇吳提遁走追至頰根河擊破之車駕至石水而還五年復幸漠南欲襲吳提吳提遠遁乃還吳提死子吐賀真立號處可汗魏言唯也十年正月車駕北伐高昌王那出東道略陽王羯兒出西道車駕與景穆自中道出涿邪山吐賀真別部帥尒綿他拔等率千餘家來降是時軍行數千里吐賀真新立恐懼遠遁九月車駕北伐高昌王那出東道略陽王羯兒出中道與諸軍期會於地弗池吐賀真悉國精銳軍資甚盛圍那數十重那掘長圍堅守相持數日吐賀真數挑戰輒不利以那眾少而固疑大軍將至解圍夜遁那引軍追之九日九夜吐賀真益懼棄輜重踰穹隆嶺遠遁那收其輜重引軍還與車駕會於廣澤略陽王羯兒盡收其人戶畜產百餘萬自是吐賀真遂單弱遠竄邊疆息警矣太安四年車駕北征騎十萬車十五萬兩旌

旗千里遂渡大漠吐賀真遠遁其莫弗烏朱鴛頽率眾數千落來降乃刊石記功而還世祖征伐之後意存休息蠕蠕亦怖威北竄不敢復南和平五年吐賀真死子予成立號受羅部真可汗魏言惠也自稱永康元年率部侵塞北鎮遊軍大破其眾皇興四年子成犯塞車駕北討京兆王子推東陽公元丕督諸軍出西道任城王雲等督軍出東道汝陰王賜濟南公羅烏拔督軍爲前鋒隴西王源賀督諸軍爲後繼諸將會車駕于女水之濱顯祖親誓眾詔諸將曰用兵在奇不在眾也卿等爲朕力戰方略已在朕心乃選精兵五千人挑戰多設奇兵以惑之虜眾奔潰逐北三十餘里斬首五萬級降者萬餘人戎馬器械不可稱計旬有九日往返六千餘里改女水曰武川遂作北征頌刊石紀功延興五年子成求通婚媾有司以子成數犯邊塞請絕其使發兵討之顯祖曰蠕蠕譬

若禽獸貪而亾義朕要當以信誠待物不可抑絕也予成知悔前
非遣使請和求結姻媛安可孤其欺意乃詔報曰所論婚事今始
一反尋覽事理未允厥中夫男而下女交象所明初婚之吉敦崇
禮聘君子所以重人倫之本不敬其初令終難矣予成每懷譎詐
終顯祖世更不求婚太和元年四月遣莫河去汾比拔等來獻良
馬貂裘比拔等稱伏承天朝珍寶華麗甚積求一觀之乃勅有司
出御府珍玩金玉文繡器物御廐文馬奇禽異獸及人閒所宜用
者列之京肆令其歷觀焉比拔見之自相謂曰大國富麗一生所
未見也二年二月又遣比拔等朝貢尋復請婚焉高祖志存招納
許之予成雖歲貢不絕而款約不著婚事亦停九年予成死子豆
倫立號伏古敦可汗魏言恆也自稱太平元年豆倫性殘暴好殺
其臣侯醫墜石洛候數以忠言諫之又勸與國通和勿侵中國豆

論怒誣石洛候謀反殺之夷其三族十六年八月高祖遣陽平王
頤左僕射陸叡並爲都督領軍斛律桓等十二將七萬騎討豆
部內高車阿伏至羅率眾十餘萬落西走自立爲主豆論與叔父
那蓋爲二道追之豆輪出自浚稽山北而西那蓋自出金山豆
論爲阿伏至羅所敗那蓋累有勝捷國人咸以那蓋爲天所助欲
推那蓋爲主那蓋不從眾彊之那蓋曰我爲臣不可焉能爲主眾
乃殺豆論母子以屍示那蓋那蓋乃襲位那蓋號候其伏代庫者
可汗魏言悅樂也自稱太安元年那蓋死子伏圖立號他汗可汗
魏言緒也自稱始平元年正始三年伏圖遣使紇奚勿六跋朝獻
請求通和世祖不報其使詔有司勅勿六跋曰蠕蠕遠祖社論是
大魏叛臣往者包容暫時通使今蠕蠕衰微有損疇日大魏之德
方隆周漢跨據中原指清八表正以江南未平權寬北掠通和之

事未容相許若脩藩禮款誠昭著者當不孤尔也永平元年伏圖
又遣勿六跋奉函書一封并獻貂裘世宗不納依前諭遣伏圖西
征高車爲高車王彌俄突所殺子醜奴立號豆羅伏跋豆伐可汗
魏言彰制也自稱建昌元年永平四年九月醜奴遣沙門淇宣奉
獻珠像延昌三年冬世宗遣驍騎將軍馬義舒使於醜奴未發而
崩事遂停寢醜奴壯健善用兵四年遣使侯斤尉比建朝貢熙平
元年西征高車大破之禽其王彌俄突殺之盡并叛者國遂彊盛
二年又遣侯斤尉比建統奚勿六跋鞏顧禮等朝貢神龜元年二
月肅宗臨顯陽殿引顧禮等二十人於殿下遣中書舍人徐紇宣
詔讓以蠕蠕藩禮不備之意初豆淪之死也那蓋爲主伏圖納豆
淪之妻候呂陵氏生醜奴阿那瓌等六人醜奴立後忽亾一子字
祖惠求莫不能得有尼宋本作屋引副升牟妻是豆渾地萬年二十許爲醫

巫假託神鬼先常爲醜奴所信出入去來乃言此兒今在天上我能呼得醜奴母子欣悅後歲仲秋在大澤中施帳屋齋潔七日祈請天神經一宿祖惠忽在帳中自云恆在天上醜奴母子抱之悲喜大會國人號地萬爲聖女納爲可賀敦授夫副升半爵位賜牛馬羊三千頭地萬旣挾左道亦有姿色醜奴甚加重愛信用其言亂其國政如是積歲祖惠年長其母問之祖惠言我恆在地萬家不常上天上天者地萬教也其母具以狀告醜奴醜奴言地萬懸鑿遠事不可不信勿用讒言也旣而地萬恐懼譖祖惠於醜奴醜奴陰殺之正光初醜奴母遣莫何去汾李具列等絞殺地萬醜奴怒欲誅具列等又阿至羅侵醜奴醜奴擊之軍敗還爲母與其大臣所殺立醜奴弟阿那瓌立經十日其族兄侏力發示發卒衆數萬以伐阿那瓌阿那瓌戰敗將弟乙居伐輕騎南走歸國阿那瓌

母候呂陵氏及其二弟尋爲示發所殺而阿那瓌未之知也九月
阿那瓌將至肅宗遣兼侍中陸希道爲使主兼散騎常侍孟威爲
使副迎勞近畿使司空公京兆王繼至北中侍中崔光黃門郎元
纂在近郊並申宴勞引至門闕下十月肅宗臨顯陽殿引從五品
以上清官皇宗藩國使客等列於殿庭王公以下及阿那瓌等入
就庭中北面位定謁者引王公以下升殿阿那瓌位於藩王之下
又引將命之官及阿那瓌弟并二叔位於羣官之下遣中書舍人
曹道宣詔勞問阿那瓌啟云陛下優隆命臣弟叔等升殿預會但
臣有從兄在北之日官高於二叔乞命升殿詔聽之乃位於阿那
瓌弟之下二叔之上宴將罷阿那瓌執啟立於座後詔遣舍人常
景問所欲言阿那瓌求詣殿前詔引之阿那瓌再拜聽曰臣先世
源由出於大魏詔曰朕已具知阿那瓌起而言曰臣之先逐草放

牧遂居漠北詔曰卿言未盡可具陳之阿那瓌又言曰臣先祖以
來世居北土雖復隔越山津而乃心慕化未能時宣者正以高車
悖逆臣國擾攘不暇遣使以宣遠誠自頃年以前漸定高車及臣
兄爲主故遣鞏顧禮等使來大魏實欲虔脩藩禮是以曹道芝北
使之日臣與主兄卽遣大臣五人拜受詔命臣兄弟本心未及上
徹但高車從而侵暴中有姦臣因亂作逆殺臣兄立臣爲主裁過
旬日臣以陛下恩慈如天是故倉卒輕身投國歸命陛下詔曰具
卿所陳理猶未盡可更言之阿那瓌再拜受詔起而言曰臣以家
難輕來投闕老母在彼萬里分張本國臣民皆已迸散陛下隆恩
有過天地求乞兵馬還向本國誅翦叛逆收集亾散陛下慈念賜
借兵馬老母若在得生相見以申母子之恩如其死也卽得報讎
以雪大耻臣當統臨餘人奉事陛下四時之貢不敢闕絕陛下聖

顏難覩敢有披陳但所欲言者口不能盡言別有辭啟謹以仰呈
願垂昭覽仍以啟付舍人常景具以奏聞尋封阿那瓌朔方郡公
蠕蠕王賜以衣冕加之輶蓋祿從儀衛同于戚藩十二月肅宗以
阿那瓌國無定主思還綏集啟請切至詔議之時朝臣意有同異
或言聽還或言不可領軍元義爲宰相阿那瓌私以金百斤貨之
遂歸北二年正月阿那瓌等五十四人請辭肅宗臨西堂引見阿
那瓌及其伯叔兄弟五人升階賜坐遣中書舍人穆弼宣勞阿那
瓌等拜辭詔賜阿那瓌細光明人馬鎧二具鐵人馬鎧六具露絲
銀纏槩二張并白毳赤漆槩十張并白毳黑漆槩十張并幡露絲
弓二張并箭朱漆柘弓六張并箭黑漆弓十張并箭赤漆楯六幡
并刀黑漆楯六幡并刀赤漆鼓角二十具五色錦被二領黃紬被
褥三十具私府繡袍一領并帽內者緋納纁一領緋袍二十領并

帽內者雜綵千段緋納小口袴褶一具內中宛具紫納大口袴褶一具內中宛具百子帳十八具黃布幕六張新乾飯一百石麥麩八石榛麩五石銅烏鎗四枚柔鐵烏鎗二枚各受二斛黑漆竹槩四枚各受二升婢二口父草馬五百匹駝百二十頭牝牛一百頭羊五百口朱書盤器十合粟二十萬石至鎮給之詔侍中崔光黃門元纂郭外勞遣阿那瓌來奔之後其從父兄侯力發婆羅門率數萬人入討示發破之示發走奔地豆于爲其所殺推婆羅門爲主號彌偶可社句可汗魏言安靜也時安北將軍懷朔鎮將楊鈞表傳聞彼人已立主是阿那瓌同堂兄弟夷人歡心已相君長恐未肯以殺兄之人郊迎其弟輕往虛反徒損國威自非廣加兵眾無以送其入北二月肅宗詔舊經蠕蠕使者牒云具仁往喻婆羅門迎阿那瓌復藩之意婆羅門殊自驕慢無遜避之心責具仁禮

敬具仁執節不屈婆羅門遣大官莫何去汾俟力丘升頭六人將
兵二千隨具仁迎阿那瓌五月具仁還鎮論彼事勢阿那瓌慮不
敢入表求還京會婆羅門爲高車所逐率十部落詣涼州歸降於
是蠕蠕數萬相率迎阿那瓌七月阿那瓌啟云投化蠕蠕元退社
渾河旃等二人以今月二十六日到鎮云國土大亂姓別住迭
相抄掠當今北人鵠望待拯今乞依前恩賜給精兵一萬還令督
率送臣磧北撫定荒人脫蒙所請事必克濟詔付尙書門下博議
八月詔兼散騎常侍王遵業馳驛宣旨慰阿那瓌并申賜賚九月
蠕蠕後主俟匿伐來奔懷朔鎮阿那瓌兄也列稱規望乞軍并請
阿那瓌十月錄尙書事高陽王雍尙書令李崇侍中侯剛尙書左
僕射元欽侍中元乂侍中安豐王延明吏部尙書元脩義尙書李
彥給事黃門侍郎元纂給事黃門侍郎張烈給事黃門侍郎盧同

等奏曰竊聞漢立南北單于晉有東西之稱皆所以相維禦難爲國藩籬今臣等參議以爲懷朔鎮北土名無結山吐若奚泉敦煌北西海郡卽漢晉舊障二處寬平原野彌沃阿那瓌宜置西吐若奚泉婆羅門宜置西海郡各令總率部落收離聚散其爵號及資給所須唯恩裁處彼臣下之官任其舊俗阿那瓌所居既是境外宜少優遣以示威刑請沃野懷朔武川鎮各差二百人令當鎮軍主監牽給其糧仗送至前所仍於彼爲其造構功就聽還諸於北來在婆羅門前投化者今州鎮上佐準程給糧送詣懷朔阿那瓌鎮與使人量給食稟在京館者任其去留阿那瓌草創先無儲積請給朔州麻子乾飯二千斛官駝運送婆羅門居於西海既是境內資衛不得同之阿那瓌等新造藩屏宜各遣使持節馳驛先詣慰諭并委經略肅宗從之十二月詔安西將軍廷尉元洪超兼尙

書行臺詣敦煌安置婆羅門婆羅門尋與部眾謀叛投噉噉噉
三妻皆婆羅門姊妹也仍爲州軍所討禽之三年十二月阿那瓌
上表乞粟以爲田種詔給萬石四年阿那瓌眾大饑入塞寇抄肅
宗詔尙書左丞元孚兼行臺尙書持節喻之孚見阿那瓌爲其所
執以孚自隨驅掠良口二千公私驛馬牛羊數十萬北遁謝孚放
還詔驃騎大將軍尙書令李崇等率騎十萬討之出塞三千餘里
至瀚海不及而還俟匿伐至洛陽肅宗臨西堂引見之五年婆羅
門死於洛南之館詔贈使持節鎮西將軍秦州刺史廣牧公是歲
沃野鎮人破六韓拔陵反諸鎮相應孝昌元年春阿那瓌率眾討
之詔遣牒云具仁齋雜物勞賜阿那瓌阿那瓌拜受詔命勒眾十
萬從武川鎮西向沃野頻戰克捷四月肅宗又遣兼通直散騎常
侍中書舍人馮雋使阿那瓌宣勞班賜有差阿那瓌部落旣和士

馬稍盛乃號勅連頭兵豆伐可汗魏言把攬也十月阿那瓌復遣
郁久閭彌娥等朝貢三年四月阿那瓌遣使人鞏鳳景等朝貢及
還肅宗詔之曰北鎮羣狄爲逆不息蠕蠕主爲國立忠助加誅討
言念誠心無忘寢食今知停在朔垂與尔朱榮隣接其嚴勒部曲
勿相暴掠又近得蠕蠕主啟更欲爲國東討但蠕蠕主世居北漠
不宜炎夏今可且停聽待後勅蓋朝廷慮其反覆也此後頻使朝
貢建義初孝莊詔曰夫勲高者賞重德厚者名隆蠕蠕主阿那瓌
鎮衛北藩禦侮朔表遂使陰山息警弱水無塵刊跡狼山銘功瀚
海至誠旣篤勲緒莫酬故宜標以殊禮何容格以常式自今以後
讚拜不言名上書不稱臣太昌元年六月阿那瓌遣烏句蘭樹什
伐等朝貢并爲長子請尙公主永熙二年四月出帝詔以范陽王
誨之長女瑯邪公主許之未及婚帝入關齊獻武王遣使說之阿

那瓌遣使朝貢求婚獻武王方招四遠以常山王妹安樂公主許之改爲蘭陵公主瓌遣奉馬千匹爲娉禮迎公主詔宗正元壽送公主往北自是朝貢相尋瓌以齊獻武王威德日盛請致愛女於王靜帝詔王納之自此塞外無塵矣

匈奴宇文莫槐出於遼東塞外其先南單于遠屬也世爲東部大人其語與鮮卑頗異人皆翦髮而留其頂上以爲首飾長過數寸則截短之婦女披長襦及足而無裳焉秋收烏頭爲毒藥以射禽獸莫槐虐用其民爲部人所殺更立其弟普撥爲大人普撥死子丘不勤立尙平文女丘不勤死子莫槐立本名犯太祖諱莫槐遣弟屈雲攻慕容廆擊破之又遣別部素延伐慕容廆於棘城復爲慕容廆所破時莫槐部眾彊盛自稱單于塞外諸部咸畏憚之莫槐死子遜昵延立率眾攻慕容廆於棘城廆子翰先戍於外遜

昵延謂其眾曰翰素果勇必爲人患宜先取之城不足憂也乃分
騎數千襲翰聞之使人詐爲段末波使者逆謂遜昵延曰翰數爲
吾患久思除之今聞來討甚善戒嚴相待宜兼路早赴翰設伏待
之遜昵延以爲信然長驅不備至於伏所爲翰所虜翰馳使告虜
乘勝遂進及晨而至虜亦盡銳應之遜昵延見而方嚴率眾逆戰
前鋒始交而翰已入其營縱火燎之眾乃大潰遜昵延單馬奔還
悉俘其眾遜昵延父子世雄漠北又先得玉璽三紐自言爲天所
相每自誇大及此敗也乃卑辭厚幣遣使朝獻于昭帝帝嘉之以
女妻焉遜昵延死子乞得龜立復伐慕容虜拒之惠帝三年乞
得龜屯保澆水固壘不戰遣其兄悉跋堆襲虜子仁于栢林仁逆
擊斬悉跋堆虜又攻乞得龜克之乞得龜單騎夜奔悉虜其眾乘
勝長驅入其國城收資財億計徙部民數萬戶以歸先是海出大

龜枯死於平郭至是而乞得龜敗別部人逸豆歸殺乞得龜而自立與慕容晃相攻擊遣其國相莫渾伐晃而莫渾荒酒縱獵爲晃所破死者萬餘人建國八年晃伐逸豆歸逸豆歸拒之爲晃所敗殺其驍將涉亦干逸豆歸遠遁漠北遂奔高麗晃徙其部眾五千餘落於昌黎自此散滅矣

徒何段就六眷本出於遼西其伯祖曰陸眷因亂被賣爲漁陽烏丸太庫辱官家奴諸大人集會幽州皆持唾壺唯庫辱官獨無乃唾曰陸眷口中曰陸眷因咽之西向拜天曰願使主君之智慧祿相盡移入我腹中其後漁陽大饑庫辱官以曰陸眷爲健使將之詣遼西逐食招誘凶叛遂至彊盛曰陸眷死弟乞珍代立乞珍死子務目塵代立卽就六眷父也據有遼西之地而臣於晉其所統三萬餘家控絃上馬四五萬騎晉穆帝幽州刺史王浚以段氏數

爲已用深德之乃表封務目塵爲遼西公假大單于印綬浚使務
目塵率萬餘騎伐石勒於常山封龍山下大破之務目塵死就陸
眷立就陸眷與弟匹磾從弟末波等率五萬餘騎圍石勒於襄國
勒登城望之見將士皆釋仗寢卧無警備之意勒因其懈怠選募
勇健穿城突出直衝末波生禽之置之座上與飲宴盡歡約爲父
子盟誓而遣之末波旣得免就陸眷等遂攝軍而還不復報浚歸
于遼西自此以後末波常不敢南向洩焉人問其故末波曰吾父
在南其感勒不害已也如此就陸眷死其子幼弱匹磾與劉琨世
子羣奔喪匹磾陰卷甲而往欲殺其從叔羽鱗及末波而奪其國
末波等知之遣軍逆擊匹磾劉羣爲末波所獲匹磾走還薊懼琨
禽已請琨宴會因執而害之匹磾旣殺劉琨與羽鱗末波自相攻
擊部眾乖離欲擁其眾徙保上谷阻軍都之險以拒末波等平文

帝聞之陰嚴精騎將擊之匹磾恐懼南奔樂陵後石勒遣石虎擊
段文鴛于樂陵破之生擒文鴛匹磾遂率其屬及諸塢壁降于石
勒末波自稱幽州刺史屯遼西末波死國人立曰陸眷弟護遼爲
主烈帝時假護遼驃騎大將軍幽州刺史大單于北平公弟鬱蘭
撫軍將軍冀州刺史渤海公建國元年石虎征護遼於遼西護遼
奔平岡山遂投慕容晃晃殺之鬱蘭奔石虎以所徙鮮卑五千人
配之使屯令支鬱蘭死子龕代之及冉閔之亂龕率眾南移遂據
齊地慕容儁使弟之恭帥眾伐龕於廣固執龕送之薊雋毒其目
而殺之坑其徒三千餘人

高車蓋古赤狄之餘種也初號爲狄歷北方以爲勅勒諸夏以爲
高車丁零其語略與匈奴同而時有小異或云其先匈奴之甥也
其種有狄氏表紇氏斛律氏解批氏護骨氏異奇斤氏俗云匈奴

單于生二女姿容甚美國人皆以爲神單于曰吾有此女安可配人將以與天乃於國北無人之地築高臺置二女其上曰請天自迎之經三年其母欲迎之單于曰不可未徹之間耳復一年乃有一老狼晝夜守臺嗥呼因穿臺下爲空穴經時不去其小女曰吾父處我於此欲以與天而今狼來或是神物天使之然將下就之其姊大驚曰此是畜生無乃辱父母也妹不從下爲狼妻而產子後遂滋繁成國故其人好引聲長歌又似狼嗥無都統大帥當種各有君長爲性麤猛黨類同心至於寇難翕然相依鬪無行陳頭別衝突乍出乍入不能堅戰其俗躡蹠褻黷無所忌避婚姻用牛馬納聘以爲榮結言既定男黨營車闌馬令女黨恣取上馬祖乘出闌馬主立於闌外振手驚馬不墜者卽取之墜則更取數滿乃止俗無穀不作酒迎婦之日男女相將持馬酪熟肉節解主人延

寶亦無行位穹廬前叢坐飲宴終日復留其宿明日將婦歸既而將夫黨還入其家馬羣極取良馬父母兄弟雖惜終無言者頗諱取寡婦而優憐之其畜產自有記識雖闌縱在野終無妄取俗不清潔喜致震霆每震則叫呼射天而棄之移去至來歲秋馬肥復相率候於震所埋殺羊然火拔刀女巫祝說似如中國祓除而羣隊馳馬旋繞百帀乃止人持一束柳棖回豎之以乳酪灌焉婦人以皮裹羊骸戴之首上縈屈髮鬢而綴之有似軒冕其死亾葬送掘地作坎坐屍於中張臂引弓佩刀挾稍無異於生而露坎不掩時有震死及疫癘則爲之祈福若安全無佗則爲報賽多殺雜畜燒骨以燎走馬遶旋多者數百帀男女無小大皆集會平吉之人則歌舞作樂死喪之家則悲吟哭泣其遷徙隨水草衣皮食肉牛羊畜產盡與蠕蠕同唯車輪高大輻數至多後徙於鹿渾海西北

百餘里部落疆大常與蠕蠕爲敵亦每侵盜于國家太祖親襲之
大破其諸部後太祖復度弱洛水西行至鹿渾海停駕簡輕騎西
北行百餘里襲破之虜獲生口馬牛羊二十餘萬復討其餘種於
狼山大破之車駕巡幸分命諸將爲東西二道太祖親勒六軍從
中道自駁髻水西北徇略其部諸軍同時雲合破其雜種三十餘
落衛王儀別督將從西北絕漠千餘里復破其遺迸七部於是高
車大懼諸部震駭太祖自牛川南引大校獵以高車爲圍騎徒遮
列周七百餘里聚雜獸於其中因驅至平城卽以高車衆起鹿苑
南因臺陰北距長城東包白登屬之西山尋而高車姪利曷莫弗
勅力犍率其九百餘落內附拜勅力犍爲揚威將軍置司馬參軍
賜穀二萬斛後高車解批莫弗幡豆建復率其部三十餘落內附
亦拜爲威遠將軍置司馬參軍賜衣服歲給廩食蠕蠕社論破敗

之後收拾部落轉徙廣漠之北侵入高車之地斛律部部帥倍侯
利患之曰社論新集兵貧馬少易與耳乃舉眾掩擊入其國落高
車昧利不顧後患分其廬室妻其婦女安息寢臥不起社論登高
望見乃招集亾散得千人晨掩殺之走而脫者十二三倍侯利遂
來奔賜爵孟都公倍侯利質直勇健過人奮戈陷陳有異於眾北
方之人畏嬰兒啼者語曰倍侯利來便止處女歌謠云求夏夫當
如倍侯其服眾如此善用五十著筮吉凶每申故得親幸賞賜豐
厚命其少子曷堂內侍及倍侯利卒太祖悼惜葬以國禮謚曰忠
壯王後詔將軍伊謂帥二萬騎北襲高車餘種壹紇烏頻破之太
祖時分散諸部唯高車以類麤獷不任使役故得別爲部落後世
祖征蠕蠕破之而還至漠南聞高車東部在巳尼陂人畜甚眾去
官軍千餘里將遣左僕射安原等討之司徒長孫翰尙書令劉潔

等諫世祖不聽乃遣原等并發新附高車合萬騎至于巴尼陂高車諸部望軍而降者數十萬落獲馬牛羊亦百餘萬皆徙置漠南千里之地乘高車逐水草畜牧蕃息數年之後漸知粒食歲致獻貢由是國家馬及牛羊遂至于賤氍毹皮委積高宗時五部高車合聚祭天眾至數萬大會走馬殺牲遊遶歌吟忻忻其俗稱自前世以來無盛於此會車駕臨幸莫不忻悅後高祖召高車之眾隨東駕南討高車不願南行遂推表紇樹者爲主相率北叛遊踐金陵都督宇文福追討大敗而還又詔平北將軍江陽王繼爲都督討之繼先遣人慰勞樹者樹者入蠕蠕尋悔相率而降高車之族又有十二姓一曰泣伏利氏二曰吐盧氏三曰乙旃氏四曰大連氏五曰窟賀氏六曰達簿干氏七曰阿喻氏八曰莫允氏九曰俟分氏十曰副伏羅氏十一曰乞袁氏十二曰右叔沛氏先是副伏羅

部爲蠕蠕所役屬豆輪之世蠕蠕亂離國部分散副伏羅阿伏至羅與從弟窮奇俱統領高車之眾十餘萬落太和十一年豆輪犯塞阿伏至羅等固諫不從怒率所部之眾西叛至前部西北自立爲王國人號之曰候婁匐勒猶魏言大天子也窮奇號候倍猶魏言儲主也二人和穆分部而立阿伏至羅居北窮奇在南豆輪追討之頻爲阿伏至羅所敗乃引眾東徙十四年阿伏至羅遣商胡越者至京師以二箭奉貢云蠕蠕爲天子之賊臣諫之不從遂叛來至此而自豎立當爲天子討除蠕蠕高祖未之信也遣使者于提往觀虛實阿伏至羅與窮奇遣使者薄頡隨于提來朝貢其方物詔員外散騎侍郎可足渾長生復與于提使高車各賜繡袴褶一具雜綵百匹窮奇後爲嚙噠所殺虜其子彌俄突等其眾分散或來奔附或投蠕蠕詔遣宣威將軍羽林監孟威撫納降人置之

高平鎮阿伏至羅長子蒸阿伏至羅餘妻謀害阿伏至羅阿伏至羅殺之阿伏至羅又殘暴大失眾心眾共殺之立其宗人跋利延爲主歲餘嘸噠伐高車將納彌俄突國人殺跋利延迎彌俄突而立之彌俄突旣立復遣朝貢又奉表獻金方一銀方一金杖二馬七匹駝十頭詔使者慕容坦賜彌俄突雜綵六十匹世祖詔之曰卿遠據沙外頻申誠款覽揖忠志特所欽嘉蠕蠕嘸噠吐谷渾所以交通者皆路由高昌犄角相接今高昌內附遣使迎引蠕蠕往來路絕姦勢不得妄令羣小敢有陵犯擁塞王人罪在不赦彌俄突尋與蠕蠕主伏圖戰於蒲類海北爲伏圖所敗西走三百餘里伏圖次於伊吾北山先是高昌王麴嘉表求內徙世宗遣孟威迎之至伊吾蠕蠕見威軍怖而遁走彌俄突聞其離駭追擊大破之殺伏圖於蒲類海北割其髮送於孟威又遣使獻龍馬五匹金銀

貂皮及諸方物詔東城子于亮報之賜樂器一部樂工八十人赤
紬十匹雜綵六十四匹彌俄突遣其莫何去汾屋引叱賀真貢其方
物肅宗初彌俄突與蠕蠕主醜奴戰敗被禽醜奴繫其兩腳於驚
馬之上頓曳殺之漆其頭爲飲器其部眾悉入嚙噠經數年嚙噠
聽彌俄突弟伊匄還國伊匄旣復國遣使奉表於是詔遣使者谷
楷等拜爲鎮西將軍西海郡開國公高車王伊匄復大破蠕蠕
蠕王婆羅門走投涼州正光中伊匄遣使朝貢因乞朱畫步挽一
乘并幔褙鞞鞞一副織扇各一枚青曲蓋五枚赤漆扇五枚鼓角
十枚詔給之伊匄後與蠕蠕戰敗歸其弟越居殺伊匄自立天平
中越居復爲蠕蠕所破伊匄子比適復殺越居而自立興和中比
適又爲蠕蠕所破越居子去賓自蠕蠕來奔齊獻武王欲招納遠
人上言封去賓爲高車王拜安北將軍肆州刺史旣而病死初太

祖時有吐突隣部在女水上常與解如部相爲唇齒不俱職事登國三年太祖親西征度弱洛水復西行趣其國至女水上討解如部落破之明年春盡略徙其部落畜產而還又有紇突隣與紇奚世同部落而谷有大人長帥擁集種類常爲寇於意辛山登國五年太祖勒眾親討焉慕容麟率師來會大破之紇突隣大人屋地纒紇奚大人庫寒等皆舉部歸降皇始二年車駕伐中山軍於栢肆慕容寶夜來攻營軍人驚走還於國路由并州遂反將攻晉陽并州刺史元延討平之紇突隣部帥匿物尼紇奚部帥叱奴根等復聚黨反於陰館南安公元順討之不克死者數千人太祖聞之遣安遠將軍庾岳還討匿物尼等皆殄之又有侯呂隣部眾萬餘口常依險畜牧登國中其大人叱伐爲寇於苦水河八年夏太祖大破之并禽其別帥焉古延等薛干部常屯聚於三城之間及滅

衛辰後其部帥太悉伏望軍歸順太祖撫安之車駕還衛辰子屈
丐奔其部太祖聞之使使詔太悉伏執送之太悉伏出屈丐以示
使者曰今窮而見投盜與俱亾何忍送之遂不遣太祖大怒車駕
親討之會太悉伏先出擊曹覆寅官軍乘虛遂屠其城獲太悉伏
妻子珍寶徙其人而還太悉伏來赴不及遂奔姚興未幾亾歸嶺
北上郡以西諸鮮卑雜胡聞而皆應之天賜五年屈丐盡劫掠總
服之及平統萬薛千種類皆得爲編戶矣而率屯山鮮卑別種破
多蘭部世傳主部落至木易干有武力壯勇劫掠左右西及金城
東侵安定數年間諸種患之天興四年遣常山王遵討之於高平
木易干將數千騎棄國遁走盡徙其人於京師餘種分徙其後爲
赫連屈丐所滅又黜弗素古延等諸部富而不恭天興五年材官
將軍和突率六千騎襲而獲之又越勒倍泥部永興五年轉牧跋

那山西七月遣奚斤討破之徙其人而還

史臣曰周之獫狁漢之匈奴其作害中國固亦久矣魏晉之世種族瓜分去來沙漠之陲窺擾鄯塞之際猶皆東胡之餘緒冒頓之枝葉至如蠕蠕者匈奴之裔根本莫尋逃形集醜自小爲大風馳鳥赴倏來忽往代京由之屢駭戎車所以不寧是故魏氏祖宗揚威曜武驅其畜產收其部落翦之窮髮之野逐之無人之鄉豈好肆兵極銳凶器不戢蓋亦急病除惡事不得已而然也

魏書卷二百三
列傳第九十一 終

魏收書列傳第九十一

大梁書局印
四庫全書本

魏書卷一百四

列傳第九十二

自序

漢初魏無知封高良侯子均均子恢恢子彥彥子歆字子胡幼孤
有志操博洽經史成帝世位終鉅鹿太守仍家焉歆子悅字處德
性沈厚有度量宣城公趙國李孝伯見而重之以女妻焉位濟陰
太守以善政稱悅子子建字敬忠釋褐奉朝請累遷太尉從事中
郎初世祖時平氏遂於武興立鎮尋改爲東益州其後鎮將刺史
乖失人和羣氏作梗遂爲邊患乃除子建爲東益州刺史子建布
以恩信風化大行遠近清靜正光五年南北二秦城人莫折念生
韓祖香張長命相繼構逆僉以州城之人莫不勁勇同類悉反宜
先收其器械子建以爲城人數當行陳盡皆驍果安之足以爲用

急之腹背爲憂乃悉召居城老壯曉示之并上言諸城人本非罪坐而來者悉求聽免肅宗優詔從之子建漸分其父兄子弟外居郡戍內外相顧終獲保全及秦賊乘勝屯營黑水子建乃潛使掩襲前後斬獲甚眾威名赫然先反者及此悉降乃間使上聞肅宗甚嘉之詔子建兼尙書爲行臺刺史如故於是威震蜀土其梁巴二益兩秦之事皆所節度梁州刺史傅豎眼子敬和中心以爲愧在洛大行貨賄以圖行臺先是子建亦屢求歸京師至此乃遣刺史唐永代焉豎眼因爲行臺子建將還羣氏慕戀相率斷道主簿楊僧覆先行曉喻諸氏忿曰我留刺史爾送出也斫之數創幾死子建徐加慰譬旬日方得前行吏人贈遺一無所受而東益氏蜀尋反攻逼唐永棄城而走乃喪一藩矣初永之走子建客有沙門曇琛及鉅鹿人耿顯皆沒落氏手及知子建之客垂泣追衣物

還之送出白馬遺愛所被如此自國家開華陽等郡梁州邢巒益
州傅豎眼及子建爲最初子建爲前軍將軍十年不徙在洛閑暇
與吏部尙書李韶韶從弟延寔頗爲奕其時人謂爲耽好子建每
曰其於機權廉勇之際得之深矣且吾未爲時用博奕可也及一
臨邊事凡經五年未曾對局還洛後俄拜常侍衛尉卿初元顥內
逼莊帝北幸子建謂所親盧義僖曰北海自絕社稷稱藩蕭衍吾
老矣豈能爲陪臣遂攜家口居洛南顥平乃歸先苦風痺及此遂
甚以卿任有務屢上書乞身特除右光祿大夫邢杲之平太傅李
延寔子侍中或爲大使撫慰東土時外戚貴盛送客填門子建亦
往候別延寔曰小兒今行何以相勗子建曰益以盈滿爲誡延寔
悵然久之及莊帝殺余朱榮遇禍於河陰者其家率相弔賀太尉
李虔第二子仁曜子建之女壻往亦見害子建謂姨弟盧道虔曰

朝廷誅翦權彊凶徒尙梗未聞有奇謀異略恐不可濟此乃李門禍始弔賀無乃怱怱及永安之後李氏宗族流離或遇誅夷如其所慮後歷左光祿大夫加散騎常侍驃騎大將軍子建自出爲蒲牧董司山南居脂膏之中遇天下多事正身潔已不以財利經懷及歸京師家人衣食常不周贍清素之迹著於終始性存重慎不雜交遊唯與尙書盧義僖姨弟涇州刺史盧道裕雅相親昵及疾篤顧勅二子曰死生大分含氣所同世有厚葬吾平生不取籩簞裸身又非吾意氣絕之後斂以時服吾生年契闊前後三娶合葬之事抑又非古且汝二母先在舊塋墳地久固已有定別唯汝次母墓在外耳可遷入兆域依班而定行於吾墓之後如此足矣不須耐合當順吾心勿令吾有遺恨永熙二年春卒于洛陽孝義里舍時年六十三贈儀同三司定州刺史諡曰文靜二子收祚收字

伯起小字佛助年十五頗已屬文及隨父赴邊值四方多難好習
騎射欲以武藝自達滎陽鄭伯調之曰魏郎弄戟多少收慙遂折
節讀書夏月坐板牀隨樹陰諷誦積年牀板爲之銳滅而精力不
輟以文華顯初以父功除太學博士及尒朱榮於河陰濫害朝士
收亦在圍中以曰晏獲免吏部尙書李神雋重收才學奏授司徒
記室參軍永安三年除北主客郎中前廢帝立妙簡近侍詔試收
爲封禪書收下筆便就不立草藁文將干言所改無幾時黃門郎
賈思同侍立深奇之帝曰雖七步之才無以過此遷散騎侍郎尋
勅典起居注并脩國史俄兼中書侍郎年二十六出帝初又詔收
攝本職文誥填積事咸稱旨黃門郎崔悛從齊獻武王入朝熏灼
於世收初不詣門悛爲帝登祚赦云朕託體孝文收嗤其率直正
員郎李慎以告之悛深忿忌時前廢帝殂令收爲詔悛乃宣言收

晉秦世出入幃幄一日造詔優爲詞旨然則義旗之士盡爲逆人
又收父老合解官歸侍南臺將加彈劾賴尙書辛雄爲言於中尉
綦儁乃解收有賤生弟仲同先未齒錄因此怖懼上籍遣還鄉扶
侍出帝嘗大發士卒狩於嵩少之南旬有六日時旣寒苦朝野嗟
怨帝與從官皆胡服而騎宮人及諸妃主雜其間奇伎異飾多非
禮度收欲言則畏懼欲默不能已乃上南狩賦以諷焉年二十七
雖富言淫麗而終歸雅正帝手詔報焉甚見褒美鄭伯謂曰卿不
遇老夫猶應逐兔初齊獻武王固讓天柱大將軍帝勅收爲詔令
遂所請欲加相國問收相國品秩收以實對帝遂止收旣未測主
相之意以前事不安求解詔許焉久之除帝兄子廣平王贊開府
從事中郎收不敢辭乃爲庭竹賦以致已意尋兼中書舍人與濟
陰溫子昇河間邢子才齊譽世號三才時出帝猜忌獻武內有間

隙收遂以疾固辭而免其舅崔孝芬怪而問之收曰懼有晉陽之
甲尋而獻武南上帝西人關收兼通直散騎常侍副王昕聘蕭衍
昕風流文辯收辭藻富逸衍及其羣臣咸加敬異先是南北初和
李諧盧元明首通使命二人才器並爲隣國所重至此衍稱曰盧
李命世王魏中興未知後來復何如耳文襄啓收兼散騎常侍脩
國史武定二年除正常侍領兼中書侍郎仍脩史帝宴百寮問何
故名人曰皆莫能知收對曰晉議郎董勛答問稱俗云正月一日
爲雞二日爲狗三日爲豬四日爲羊五日爲牛六日爲馬七日爲
人時邢邵亦在側甚惡焉自南北和好書下紙每云想彼境內寧
靜此率土安和蕭衍後使其書乃去彼字自稱猶著此欲示無外
之意收定報書云想境內清晏今萬國安和南人復書依以爲體
後獻武入朝靜帝授相國固讓令收爲啓啓成呈上文襄時侍側

獻武指收曰此人當復爲崔光四年獻武於西門豹祠宴集謂司馬子如曰魏收爲史官書吾善惡聞北伐時諸貴常餉史官飲食司馬僕射頗會餉不因其大笑仍謂收曰卿勿見元康等在吾目下趨走謂吾以爲勤勞我後世身名在卿手勿謂我不知尋加兼著作郎靜帝會季秋大射普令賦詩收詩末云尺書徵建鄴折簡召長安文襄壯之顧謂人曰在朝今有魏收便是國之光采雅俗文墨通達縱橫我亦使子才子昇時有所作至於詞氣並不及之吾或意有所懷忘而不語語而不盡意有未及及收呈草皆以周悉此亦難有又勅兼主客郎接蕭衍使謝琿徐陵侯景旣陷臺城衍鄱陽王範時爲合州刺史文襄勅收以書喻之範得書乃率部伍西上關州刺史崔聖念入據其城文襄謂收曰今定一州卿有其力猶恨尺書徵建鄴未効耳文襄崩文宣如晉陽令與黃門郎

崔季舒高德正吏部郎中尉瑾於北第參掌機密轉祕書監兼著作郎又除定州大中正時齊將受禪楊愔奏收置之別館令撰禪代詔冊諸文遣徐之才守門不聽出天保元年除中書令仍兼著作郎封富平縣子二年授詔撰魏史除魏尹故優以祿力專在史閣不知郡事初帝令羣臣各言志收曰臣願得直筆東觀早出魏書故帝使收專其任又詔平原王高隆之總監之隆之署名而已帝勅收曰好直筆我終不作魏太武誅史官始魏初鄧淵撰代記十餘卷其後崔浩典史游雅高允程駿李彪崔光李珍之世脩其業浩爲編年體彪始分作紀表志傳書猶未出世宗時命邢巒追撰高祖起居注書至太和十四年又命崔鴻王遵業補續焉下訖肅宗事甚委悉濟陰王暉業撰辨宗室錄三十卷收於是與通直常侍房延祐司空司馬辛元植國子博士刁柔裴昂之尙書郎高

孝幹專總斟酌以成魏書辨定名稱隨條甄舉又搜採亾遺綴續
後事備一代史籍表而上聞勒成一代大典凡十二紀九十二列
傳合一百一十卷五年三月奏上之秋除梁州刺史收以志未成
奏請終業許之十一月復奏十志天象四卷地形三卷律歷二卷
禮樂四卷食貨一卷刑罰一卷靈徵二卷官氏二卷釋老一卷凡
二十卷續於紀傳合一百三十卷分爲十二帙其史三十五例二
十五序九十四論前後二表一啟焉